

四庫全書

史部

欽定四庫全書

史部

通鑑紀事本末卷二十九中

詳校官編修臣翟槐

編修臣裴謙覆勘

總校官檢討臣何思鈞

校對官中書臣王慶長

謄錄監生臣吉世琛

欽定四庫全書

通鑑紀事本末卷二十九中

宋 袁樞 撰

唐平遼東

唐高祖武德四年秋七月乙丑高句麗王建武遣使入貢建武元之弟也

五年止以隋末戰士多沒於高麗是歲賜高麗王建武書使悉遣還亦使州縣索高麗人在中土者遣歸其國

建武奉詔遣還中國民前後以萬數

七年春二月丁未高麗王建武遣使來請班歷遣使冊
建武為遼東郡王高麗王以百濟王夫餘璋為帶方郡
王新羅王金真平為樂浪郡王

九年 新羅百濟高麗三國有宿仇迭相攻擊上遣國
子助教朱子奢往諭指三國皆上表謝罪

太宗貞觀五年 新羅王真平卒無嗣國人立其女善
德為王

十五年秋七月上遣職方郎中陳大德使高麗八月己亥自高麗還大德初入其境欲知山川風俗所至城邑以綾綺遺其守者曰吾雅好山水此有勝處吾欲觀之守者喜導之遊歷無所不至徃徃見中國人自云家在某郡隋末從軍沒於高麗高麗妻以遊女與高麗錯居殆將半矣因問親戚存沒大德給之曰皆無恙咸涕泣相告數日後隋人望之而哭者徧於郊野大德言於上曰其國聞高昌亡大懼館候之勤加於常數上曰高麗

本四郡地耳吾發卒數萬攻遼東彼必傾國救之別遣舟師出東萊自海道趨平壤水陸合勢取之不難但山東州縣彫瘵未復吾不欲勞之耳

十六年冬十一月丁巳營州都督張儉奏高麗東部大人泉蓋蘇文弑其王武蓋蘇文凶暴多不法其王及大臣議誅之蓋蘇文密知之悉集部兵若校閱者并盛陳酒饌於城南召諸大臣共臨視勒兵盡殺之死者百餘人因馳入宮手弑其王斷為數段棄溝中立王弟子藏

為王自為莫離支其官如中國吏部兼兵部尚書也於是號令遠近專制國事蓋蘇文狀貌雄偉意氣豪逸身佩五刀左右莫敢仰視每上下馬常令貴人武將伏地而履之出行必整隊伍前導者長呼則人皆奔迸不避阬谷路絕行者國人甚苦之 亳州刺史裴思莊奏請伐高麗上曰高麗王武職貢不絕為賊臣所弑朕哀之甚深固不忘也但因喪乘亂而取之雖得之不貴且山東彫弊吾未忍言用兵也

十七年夏六月丁亥太常丞鄧素使高麗還請於懷遠鎮增戍兵以逼高麗上曰遠人不服則修文德以來之未聞一二百戍兵能威絕域者也上曰蓋蘇文弑其君而專國政誠不可忍以今日兵力取之不難但不欲勞百姓吾欲且使契丹靺鞨擾之何如長孫無忌曰蓋蘇文自知罪大畏大國之討必嚴設守備陛下姑為之隱忍彼得以自安必更驕惰愈肆其惡然後討之未晚也上曰善戊辰詔以高麗王藏為上柱國遼東郡王高麗

王遣使持節冊命 秋九月庚辰新羅遣使言百濟攻
取其國四十餘城復與高麗連兵謀絕新羅入朝之路
乞兵救援上命司農丞相里玄獎齋璽書賜高麗曰新
羅委質國家朝貢不乏爾與百濟各宜戢兵若更攻之
明年發兵擊爾國矣

十八年春正月相里玄獎至平壤莫離支已將兵擊新
羅破其兩城高麗王使召之乃還玄獎諭使勿攻新羅
莫離支曰昔隋人入寇新羅乘釁侵我地五百里自非

歸我侵地恐兵未能已玄獎曰既往之事焉可追論至
於遼東諸城本皆中國郡縣中國尚且不言高麗豈得
必求故地莫離支竟不從二月乙巳朔玄獎還具言其
狀上曰蓋蘇文弑其君賊其大臣殘虐其民今又違我
詔命侵暴隣國不可以不討諫議大夫褚遂良曰陛下
指麾則中原清宴顧眄則四夷讐服威望大矣今乃渡
海遠征小夷若指期克捷猶可也萬一蹉跌傷威損望
更興忿兵則安危難測矣李世勣曰間者薛延陀入寇

陛下欲發兵窮討魏徵諫而止使至今為患邇用陛下之策北鄙安矣上曰然此誠徵之失朕尋悔之而不欲言恐塞良謀故也上欲自征高麗褚遂良上疏以為天下譬猶一身兩京心腹也州縣四支也四夷身外之物也高麗罪大誠當致討但命二三猛將將四五萬衆仗陛下威靈取之如反掌耳今太子新立年尚幼穉自餘藩屏陛下所知一旦棄金湯之全踰遼海之險以天下之君輕行遠舉皆愚臣之所甚憂也上不聽時羣臣多

諫征高麗者上曰八堯九舜不能冬種野夫童子春種而生得時故也夫天有其時人有其功蓋蘇文陵上虐下民延頸待救此正高麗可亡之時也議者紛紛但不見此耳上將征高麗秋七月辛卯勅將作大匠閻立德等詣洪饒江三州造船四百艘以載軍糧甲午下詔遣營州都督張儉等帥幽營二都督兵及契丹奚靺鞨先擊遼東以觀其勢以太常卿韋挺為饋運使以民部侍郎崔仁師副之自河北諸州皆受挺節度聽以便宜從

事又命太僕少卿蕭銑運河南諸州糧入海銑瑀之子也九月乙未鴻臚奏高麗莫離支貢白金褚遂良曰莫離支弑其君九夷所不容今將討之而納其金此部鼎之類也臣謂不可受上從之上謂高麗使者曰汝曹皆事高武有官爵莫離支弑逆汝曹不能復讎今更為之遊說以欺大國罪孰大焉悉以屬大理

冬十月甲寅車駕行幸洛陽十一月壬申至洛陽前宜州刺史鄭元璿已致仕上以其常從隋煬帝伐高麗

召詣行在問之對曰遼東道遠糧運艱阻東夷善守城
攻之不可猝下上曰今日非隋之比公但聽之張儉等
值遼水漲久不得濟上以為畏懦召儉詣洛陽至具陳
山川險易水草美惡上悅上聞洺州刺史程名振善用
兵召問方略嘉其才敏即日拜右驍衛將軍甲午以刑
部尚書張亮為平壤道行軍大總管帥江淮嶺硤兵四
萬長安洛陽募士三千戰艦五百艘自萊州泛海趨平
壤又以太子詹事左衛率李世勣為遼東道行軍大總

管帥步騎六萬及蘭河二州降胡趣遼東兩軍合勢並
進庚子諸軍大集於幽州遣行軍總管姜行本少府少
監丘行淹先督衆工造梯衝於安蘿山時遠近勇士應
募及獻攻城器械者不可勝數上皆親加損益取其便
易又手詔諭天下以高麗蓋蘇文弑主虐民情何可忍
今欲巡幸幽薊問罪遼碣所過營頓無為勞費且言昔
隋煬帝殘暴其下高麗王仁愛其民以思亂之軍擊安
和之衆故不能成功今略言必勝之道有五一日以大

擊小二曰以順討逆三曰以治乘亂四曰以逸敵勞五
曰以悅當怨何憂不克布告元元勿為疑懼於是凡頓
舍供費之具減者大半十一月辛丑武陽懿公李大亮
卒於長安遺表請罷高麗之師 甲寅詔諸軍及新羅
百濟奚契丹分道擊高麗

十九年春二月庚戌上自將諸軍發洛陽以特進蕭瑀
為洛陽宮留守乙卯詔朕發定州後宜令皇太子監國
開府儀同三司致仕尉遲敬德上言陛下親征遼東太

子在定州長安洛陽心腹空虛恐有玄感之變且邊隅
小夷不足以勤萬乘願遣偏師征之指期可殄上不從
以敬德為左一馬軍總管使從行 癸亥上至鄴自為
文祭魏太祖曰臨危制變料敵設奇一將之智有餘萬
乘之才不足是月李世勣軍至幽州三月丁丑車駕至
定州丁亥上謂侍臣曰遼東本中國之地隋氏四出師
而不能得朕今東征欲為中國報子弟之讎高麗雪君
父之耻耳且方隅大定惟此未平故及朕之未老用士

大夫餘力以取之朕自發洛陽惟噉肉飯雖春蔬亦不
之進懼其煩擾故也上見病卒召至御榻前存慰付州
縣療之士卒莫不感悅有不預征名自願以私裝從軍
動以千計皆曰不求縣官勲賞惟願效死遼東上不許
上將發太子悲泣數日上曰今留汝鎮守輔以俊賢欲
使天下識汝風采夫為國之要在於進賢退不肖賞善
罰惡至公無私汝當努力行此悲泣何為命開府儀同
三司高士廉攝太子太傅與劉洎馬周少詹事張行成

右庶子高季輔同掌機務輔太子長孫無忌岑文本與
吏部尚書楊師道從行壬辰車駕發定州親佩弓矢手
結雨衣於鞍後命長孫無忌攝侍中楊師道攝中書令
李世勣軍發柳城多張形勢若出懷遠鎮者而潛師北
趣角道出高麗不意夏四月戊戌朔世勣自通定濟遼
水至玄菟高麗大駭城邑皆閉門自守壬寅遼東道副
大總管江夏王道宗將兵數千至新城折衝都尉曹三
良引十餘騎直壓城門城中驚擾無敢出者營州都督

張儉將胡兵為前鋒進渡遼水趨建安城破高麗兵斬首數千級 丁未車駕發幽州上悉以軍中資糧器械簿書委岑文本夙夜勤力躬自料配籌筆不去手精神耗竭言辭舉措頗異平日上見而憂之謂左右曰文本與我同行恐不與我同返是日遇暴疾而薨其夕上聞嚴鼓聲曰文本殞沒所不忍聞命撤之時右庶子許敬宗在定州與高士廉等共知機要文本薨上召敬宗以本官檢校中書侍郎 壬子李世勣等拔蓋牟城獲二

萬餘口糧十餘萬石張亮帥舟師自東萊渡海襲卑沙城其城四面懸絕惟西門可上程名振引兵夜至副總管王大度先登五月己巳拔之獲男女八千口分遣總管丘孝忠等曜兵於鴨綠水李世勣進至遼東城下庚午車駕至遼澤泥淖二百餘里人馬不可通將作大匠閻立德布土作橋軍不留行壬申度澤東乙亥高麗步騎四萬救遼東江夏王道宗將四千騎逆擊之軍中皆以為衆寡懸絕不若深溝高壘以俟車駕之至道宗曰

賊恃衆有輕我心遠來疲頓擊之必敗且吾屬為前軍
當清道以待乘輿乃更以賊遺君父乎李世勣以為然
果毅都尉馬文舉曰不遇勣敵何以顯壯士策馬赴敵
所向皆靡衆心稍安既合戰行軍總管張君義退走唐
兵不利道宗收散卒登高而望見高麗陣亂與驍騎數
十衝之左右出入李世勣引兵助之高麗大敗斬首千
餘級丁丑車駕度遼水撤橋以堅士卒之心軍於馬首
山勞賜江夏王道宗超拜馬文舉中郎將斬張君義上

自將數百騎至遼東城下見士卒負土填塹上分其尤重者於馬上持之從官爭負土致城下李世勣攻遼東城晝夜不息旬有二日上引精兵會之圍其城數百重鼓譟聲震天地甲申南風急上遣銳卒登衝竿之未熟其西南樓火延燒城中因麾將士登城高麗力戰不能敵遂克之所殺萬餘人得勝兵萬餘人男女四萬口以其城為遼州乙未進軍白巖城丙申右衛大將軍李思摩中弩矢上親為之吮血將士聞之莫不感動烏骨城

遣兵萬餘為白巖聲援將軍契苾何力以勁騎八百擊之何力挺身陷陳梁中其腰尚輦奉御薛萬備單騎往救之拔何力於萬衆之中而還何力氣益憤束瘡而戰從騎奮擊遂破高麗兵追奔數十里斬首千餘級會暝而罷萬備萬徹之弟也

六月丁酉李世勣攻白巖城西南上臨其西北城主孫代音潛遣腹心請降臨城投刀鉞為信且曰奴願降城中有不從者上以唐幟與其使曰必降者宜建之城上

代音建幟城中人以為唐兵已登城皆從之上之克遼東也白巖城請降既而中悔上怒其反覆令軍中曰得城當悉以人物賞戰士李世勣見上將受其降帥甲士數十人請曰士卒所以爭冒矢石不顧其死者貪虜獲耳今城垂拔奈何更受其降孤戰士之心上下馬謝曰將軍言是也然縱兵殺人而虜其妻孥朕所不忍將軍麾下有功者朕以庫物賞之庶因將軍贖此一城世勣乃退得城中男女萬餘口上臨水設幄受其降仍賜之

食八十以上賜帛有差他城之兵在白巖者悉慰諭給糧仗任其所之先是遼東城長史為部下所殺其省事奉其妻子奔白巖上憐其有義賜帛五匹為長史造靈輿歸之平壤以白巖城為巖州以孫代音為刺史契苾何力瘡重上自為傳藥推求得刺何力者高突勃付何力使自殺之何力奏稱彼為其主冒白刃刺臣乃忠勇之士也與之初不相識非有怨讎遂捨之初莫離支遣加尸城七百人戍蓋牟城李世勣盡虜之其人請從軍

自效上曰汝家皆在加尸汝為我戰莫離支必殺汝妻
子得一人之力而滅一家吾不忍也戊戌皆廩賜遣之已
亥以蓋牟城為蓋州丁未車駕發遼東丙辰至安市城
進兵攻之丁巳高麗北部耨薩延壽惠真帥高麗靺鞨
兵十五萬救安市上謂侍臣曰今為延壽策有三引兵
直前連安市城為壘據高山之險食城中之粟縱靺鞨
掠吾牛馬攻之不可猝下欲歸則泥濘為阻坐困吾軍
上策也拔城中之衆與之霄遁中策也不度智能來與

吾戰下策也卿曹觀之彼必出下策成擒在吾目中矣
高麗有對盧年老習事謂延壽曰秦王內芟羣雄外服
戎狄獨立為帝此命世之材今舉海內之衆而來不可
敵也為吾計者莫若頓兵不戰曠日持久分遣奇兵斷
其運道糧食既盡求戰不得欲歸無路乃可勝也延壽
不從引軍直進去安市城四十里上猶恐其低徊不至
命左衛大將軍阿史那社爾將突厥千騎以誘之兵始
交而偽走高麗相謂曰易與耳競進乘之至安市城東

南八里依山而陳上悉召諸將問計長孫無忌對曰臣聞臨敵將戰必先觀士卒之情臣適行經諸營見士卒聞高麗至皆拔刀結旆喜形於色此必勝之兵也陛下未冠身親行陳凡出奇制勝皆上稟勝謀諸將奉成算而已今日之事乞陛下指蹤上策曰諸公以此見讓朕當為諸公商度乃與無忌等從數百騎乘高望之觀山川形勢可以伏兵及出入之所高麗韎韐合兵為陳長四十里江夏王道宗曰高麗傾國以拒王師平壤之守

必弱願假臣精卒五千覆其本根則數十萬之衆可不戰而降上不應遣使紿延壽曰我以爾國彊臣弑其主故來問罪至於交戰非吾本心入爾境芻粟不給故取爾數城俟爾國修臣禮則所失必復矣延壽信之不復設備上夜召文武計事命李世勣將步騎萬五千陳於西嶺長孫無忌將精兵萬一千為奇兵自山北出於狹谷以衝其後上自將步騎四千挾鼓角偃旗幟登北山上敕諸軍聞鼓角齊出奮擊因命有司張受降幕於朝

堂之側戊午延壽等獨見李世勣布陳勒兵欲戰上望見無忌軍塵起命作鼓角舉旗幟諸軍鼓譟並進延壽等大懼欲分兵禦之而其陳已亂會有雷電龍門人薛仁貴著奇服大呼陷陳所向無敵高麗兵披靡大軍乘之高麗兵大潰斬首二萬餘級上望見仁貴召見拜游擊將軍仁貴安都之六世孫名禮以字行延壽等將餘衆依山自固上命諸軍圍之長孫無忌悉撤橋梁斷其歸路已未延壽惠真帥其衆三萬六千八百人請降入

軍門膝行而前拜伏請命上語之曰東夷少年跳梁海曲至於摧堅決勝故當不及老人自今復敢與天子戰乎皆伏地不能對上簡耨薩已下酋長三千五百人授以戎秩遷之內地餘皆縱之使還平壤皆雙舉手以頽頓地歡呼聞數十里外收靺鞨三千三百人悉阮之獲馬五萬匹牛五萬頭鐵甲萬領他器械稱是高麗舉國大駭後黃城銀城皆自拔遁去數百里無復人烟上驛書報太子仍與高士廉等書曰朕為將如此何如更名

所幸山曰駐蹕山秋七月辛未上徙營安市城東嶺已
卯詔標識戰死者尸俟軍還與之俱歸戊子以高延壽
為鴻臚卿高惠真為司農卿張亮軍過建安城下壁壘
未固士卒多出樵牧高麗兵奄至軍中駭擾亮素怯踞
胡床直視不言將士見之更以為勇總管張金樹等鳴
鼓勒兵擊高麗破之八月甲辰候騎獲莫離支諜者
高竹離反接詣軍門上召見解縛問曰何瘦之甚對曰
竊道間行不食數日矣命賜之食謂曰爾為諜宜速反

命為我寄語莫離支欲知軍中消息可遣人徑詣吾所
何必間行辛苦也竹離徒跣上賜屨而遣之丙午徙營
於安市城南上在遼外凡置營但明斥候不為塹壘雖
逼其城高麗終不敢出為寇抄軍士單行野宿如中國
馬上之克白巖也謂李世勣曰吾聞安市城險而兵精
其城主材勇莫離支之亂城守不服莫離支擊之不能
下因而與之建安兵弱而糧少若出其不意攻之必克
公可先攻建安建安下則安市在吾腹中此兵法所謂

城有所不攻者也對曰建安在南安市在北吾軍糧皆在遼東今踰安市而攻建安若賊斷吾糧道將若之何不如先攻安市安市下則鼓行而取建安耳上曰以公為將安得不用公策勿誤吾事世勣遂攻安市安市人望見上旗蓋輒乘城鼓譟上怒世勣請克城之日男子皆阬之安市人聞之益堅守攻久不下高延壽高惠真請於上曰奴既委身大國不敢不獻其誠欲天子早成大功奴得與妻子相見安市人顧惜其家人自為戰未

易猝拔今奴以高麗十餘萬望旗沮潰國人膽破烏骨城犇薩老耄不能堅守移兵臨之朝至夕克其餘當道小城必望風犇潰然後收其資糧鼓行而前平壤必不守矣羣臣亦言張亮兵在沙城召之信宿可至乘高麗兇懼併力拔烏骨城渡鴨綠水直取平壤在此舉矣上將從之獨長孫無忌以為天子親征異於諸將不可乘危徼幸今建安新城之虜衆猶十萬若向烏骨皆躡吾後不如先破安市取建安然後長驅而進此萬全之策

也上乃止諸軍急攻安市上聞城中鷄彘聲謂李世勣
曰圍城積久城中煙火日微今鷄彘甚喧此必饗士欲
夜出襲我宜嚴兵備之是夜高麗數百人縋城而下上
聞之自至城下召兵急擊斬首數十級高麗退走江夏
王道宗督衆築土山於城東南隅浸逼其城城中亦增
高其城以拒之士卒分番交戰日六七合衝車礮石壞
其樓堞城中隨立木柵以塞其缺道宗傷足上親為之
針築山晝夜不息凡六旬用功五十萬山頂去城數丈

下臨城中道宗使果毅傳伏愛將兵屯山頂以脩敵山
頽壓城城崩會伏愛私離所部高麗數百人從城缺出
戰遂奪據土山塹而守之上怒斬伏愛以徇命諸將攻
之三日不能克道宗徒跣詣旗下請罪上曰汝罪當死
但朕以漢武殺王恢不如秦穆用孟明且有破蓋牟遼
東之功故特赦汝耳上以遼左早寒草枯水凍士馬難
久留且糧食將盡癸未敕班師先拔遼蓋二州戶口渡
遼乃耀兵於安市城下而旋城中皆屏跡不出城主登

城拜辭上嘉其固守賜縑百匹以勵事君命李世勣江夏王道宗將步騎四萬為殿乙酉至遼東丙戌渡遼水遼澤泥濘車馬不通命長孫無忌將萬人翦草填澤水深處以車為梁上自繫薪於馬鞅以助役冬十月丙申朔上至蒲溝駐馬督填道諸軍度渤錯水暴風雪士卒沾濕多死者敕然火於道以待之凡征高麗拔玄菟橫山蓋牟磨米遼東白巖卑沙麥谷銀山後黃十城徙遼蓋巖三州戶口入中國者七萬人新城建安駐蹕三大

戰斬首四萬餘級戰士死者幾二千人戰馬死者什七八上以不能成功深悔之歎曰魏徵若在不使我有是行也命馳驛祀徵以少牢復立所製碑召其妻子詣行在勞賜之丙午至營州詔遼東戰亡士卒骸骨並集柳城東南命有司設太牢上自作文以祭之臨哭盡哀其父母聞之曰吾兒死而天子哭之死何所恨上謂薛仁貴曰朕諸將皆老思得新進驍勇者將之無如卿者朕不喜得遼東喜得卿也丙辰上聞太子奉迎將至從飛

騎三千人馳入臨渝關道逢太子上之發定州也指所
御褐袍謂太子曰俟見汝乃易此袍耳在遼左雖盛暑
流汗弗之易及秋穿敗左右請易之上曰軍士衣多弊
吾獨御新衣可乎至是太子進新衣乃易之諸軍所虜
高麗民萬四千口先集幽州將以賞軍士上愍其父子
夫婦離散命有司平其直悉以錢布贖為民歡呼之聲
三日不息十一月辛未車駕至幽州高麗民迎於城東
拜舞號呼宛轉於地塵埃彌望丙戌車駕至定州壬辰

車駕發定州戊申至并州

二十年春二月乙未上發并州三月己巳車駕還京師
上謂李靖曰吾以天下之衆困於小夷何也靖曰此道
宗所解上顧問江夏王道宗具陳在駐驛時乘虛取平
壤之言上悵然曰當時忽忽吾不憶也

閏月戊戌罷遼州都督府及巖州

夏五月甲寅高麗王藏及莫離支蓋金遣使謝罪并獻
二美女上還之金即蘇文也上自高麗還蓋蘇文益驕恣

雖遣使奉表其言率皆詭誕又待唐使者倨慢常窺伺邊隙屢敕令勿攻新羅而侵陵不止壬申詔勿受其朝貢更議討之丙戌車駕至京師

二十一年上將復伐高麗朝議以為高麗依山為城攻之不可猝拔前大駕親征國人不得耕種所克之城悉收其穀繼以旱災民大半乏食今若數遣偏師更迭擾其疆場使彼疲於奔命釋耒入堡數年之間千里蕭條則人心自離鴨綠之北可不戰而取矣上從之三月以

左武衛大將軍牛進達為青丘道行軍大總管右武侯將軍李海岸副之發兵萬餘人乘樓船自萊州汎海而入又以太子詹事李世勣為遼東道行軍大總管右武衛將軍孫貳郎等副之將兵三千人因營州都督府兵自新城道入兩軍皆選習水善戰者配之 李世勣軍既度遼歷南蘇等數城高麗多背城拒戰世勣擊破其兵焚其羅郭而還 秋七月牛進達海岸入高麗境凡百餘戰無不捷攻石城拔之達至積利城下高麗兵萬

餘人出戰海岸擊破之斬首二千級 八月戊戌敕宋
州刺史王波利等發江南十二州工人造大船數百艘
欲以征高麗冬十二月高麗王使其子莫離支任武入
謝罪上許之

二十二年春正月新羅王金善德卒以善德妹真德為
柱國封樂浪郡王遣使冊命 丙午詔以右武衛大將
軍薛萬轍為青丘道行軍大總管右衛將軍裴行方副
之將兵三萬餘人及樓船戰艦自萊州泛海以擊高麗

三月充容長城徐惠以上東征高麗西討龜茲上疏
諫其略曰以有盡之農功填無窮之巨浪圖未獲之他
衆喪已成之我軍昔秦皇并吞六國反速危亡之基晉
武奄有三方翻成覆敗之業豈非矜功恃大棄德輕邦
圖利忘危肆情縱欲之所致乎是知地廣非常安之術
人勞乃易亂之源也上善其言夏四月甲子烏胡鎮
將古神感將兵浮海擊高麗遇高麗步騎五千戰於易
山破之其夜高麗萬餘人襲神感船神感設伏又破之

而還 六月上以高麗困弊議以明年發三十萬衆一
舉滅之或以為大軍東征須脩經歲之糧非畜聚所能
載宜具舟艦為水運隋末劍南獨無寇盜屬者遼東之
役劍南復不預及其百姓富庶宜使之造舟艦上從之
秋七月遣右領左右府長史強偉於劍南道伐木造舟
艦大者或長百尺其廣半之別遣使行水道自巫峽抵
江揚趣萊州司空梁文昭公房玄齡疾篤謂諸子曰吾
受主上厚恩今天下無事惟東征未已羣臣莫敢諫吾

知而不言死有餘責乃上表諫以為老子曰知足不辱
知止不殆陛下威名功德亦可足矣拓地開疆亦可止
矣且陛下每決一重囚必令三覆五奏進素膳止音樂
者重人命也今驅無罪之士卒委之鋒刃之下使肝腦
塗地獨不足愍乎向使高麗違失臣節誅之可也侵擾
百姓滅之可也他日能為中國患除之可也今無此三
條而坐煩中國內為前代雪耻外為新羅報讎豈非所
存者小所損者大乎願陛下許高麗自新焚陵波之船

羅應募之衆自然華夷慶賴遠肅邇安臣旦夕入地儻
蒙錄此哀鳴死且不朽玄齡子遺愛尚上女高陽公主
上謂公主曰彼病篤如此尚能憂我國家上自臨視握
手與訣悲不自勝癸卯薨 八月丁丑敕越州都督府
及婺洪等州造海船及雙舫千一百艘 九月己丑新
羅奏為百濟所攻破其十三城 冬十二月癸未新羅
相金春秋及其子文王入見春秋真德之弟也上以春
秋為特進文王為左武衛將軍春秋請改章服從中國

內出冬服賜之

二十三年夏五月己巳上崩壬申遺詔太子即位罷遼東之役

高宗永徽二年百濟遣使入貢上戒之使勿與新羅高麗相攻不然吾將發兵討汝矣

三年春正月己未朔吐谷渾新羅高麗百濟並遣使入貢

五年夏閏四月壬辰新羅女王金真德卒詔立其弟春

秋為新羅王

六年高麗與百濟靺鞨連兵侵新羅北境取三十三城
新羅王春秋遣使求援二月乙丑遣營州都督程名振
左衛中郎將蘇定方發兵擊高麗 夏五月壬午名振
等度遼水高麗見其兵少開門度貴端水逆戰名振等
奮擊大破之殺獲千餘人焚其外郭及村落而還

顯慶三年夏六月營州都督兼東夷都護程名振右領
軍中郎將薛仁貴將兵攻高麗之赤烽鎮拔之斬首四

百餘級捕虜百餘人高麗遣其大將豆方婁帥衆三萬拒之名振以契丹逆擊大破之斬首二千五百級

四年冬十一月右領軍中郎將薛仁貴等與高麗將溫沙門戰於橫山破之

五年百濟恃高麗之援數侵新羅新羅王春秋上表求救辛亥以左武衛大將軍蘇定方為神丘道行軍大總管帥左驍衛將軍劉伯英等水陸齊進以伐百濟以春秋為嶧夷道行軍總管將新羅之衆與之合勢

秋八月蘇定方引軍自成山濟海百濟據熊津江口以拒之定方進擊破之百濟死者數千人餘皆潰走定方水陸齊進直趣其都城未至二十餘里百濟傾國來戰大破之殺萬餘人追奔入其郭百濟王義慈及太子隆逃於北境定方進圍其城義慈次子泰自立為王帥衆固守隆子文思曰王與太子皆在而叔遽擁兵自王借使能却唐兵我父子必不全矣遂帥左右踰城來降百姓皆從之泰不能止定方命軍士登城立幟泰窘迫開

門請命於是義慈隆及諸城主皆降百濟故有五部分
統三十七郡二百城七十六萬戶詔以其地置熊津等
五都督府以其酋長為都督刺史 冬十一月戊戌朔
上御則天門樓受百濟俘自其王義慈以下皆釋之

十二月壬午以左驍衛大將軍契苾何力為涇江道行
軍大總管左武衛大將軍蘇定方為遼東道行軍大總
管左驍衛將軍劉伯英為平壤道行軍大總管蒲州刺
史程名振為鏤方道總管將兵分道擊高麗青州刺史

劉仁軌坐督海運覆舩以白衣從軍自効

龍朔元年春正月乙卯募河南北淮南六十七州兵得四萬四千餘人詣平壤鏤方行營戊午以鴻臚卿蕭嗣業為扶餘道行軍總管帥迴紇等諸部兵詣平壤三月丙申朔上與羣臣及外夷宴於洛陽城門觀屯營新教之舞謂之一戎大定樂時上欲親征高麗以象用武之勢也

初蘇定方既平百濟留郎將劉仁願鎮守百濟府城又

以左衛中郎將王文度為熊津都督撫其餘衆文度濟海而卒百濟僧道琛故將福信聚衆據周留城迎故王子豐於倭國而立之引兵圍仁願於府城詔起劉仁軌檢校帶方州刺史將王文度之衆便道發新羅兵以救仁願仁軌喜曰天將富貴此翁矣於州司請唐歷及廟諱而行曰吾欲掃平東夷頌大唐正朔於海表仁軌御軍嚴整轉鬪而威所向皆平百濟立兩柵於熊津江口仁軌與新羅兵合擊破之殺溺死者萬餘人道琛等乃

釋府城之圍退保任存城新羅糧盡引還道琛自稱領
軍將軍福信自稱霜岑將軍招集徒衆其勢益張仁軌
衆少與仁願合軍休息士卒上表詔新羅出兵新羅王
春秋奉詔遣其將金欽將兵救仁軌等至古泗福信邀
擊敗之欽自葛嶺道遁還新羅不敢復出福信尋殺道
琛專總國兵

夏四月庚辰以任雅相為涇江道行軍總管契苾何力
為遼東道行軍總管蘇定方為平壤道行軍總管與蕭

嗣業及諸胡兵凡三十五軍水陸分道並進上欲自將大軍繼之癸巳皇后抗表諫親征高麗詔從之

秋七月甲戌蘇定方破高麗於涓江屢戰皆捷遂圍平壤城九月癸巳朔特進新羅王春秋卒以其子法敏為樂浪郡王新羅王

高麗蓋蘇文遣其子男生以精兵數萬守鴨綠水諸軍不得度契苾何力至值冰大合何力引衆乘冰度水鼓譟而進高麗大潰追奔數十里斬首三萬級衆悉降

生僅以身免會有詔班師乃還

二年春二月甲戌沮江道大總管任雅相薨于軍戊寅
左驍衛將軍白州刺史沃沮道總管龐於泰與高麗戰
於蛇水之上軍敗與其子十二人皆戰死蘇定方圍平
壤久不下會大雪解圍而還

秋七月丁巳熊津都督劉仁願帶方州刺史劉仁軌大
破百濟於熊津之東拔真峴城初仁願仁軌等屯熊津
城上與之敕書以平壤軍回一城不可獨固宜拔就新

羅若金法敏藉卿留鎮宜且停彼若其不須即宜泛海還也將士咸欲西歸仁軌曰人臣徇公家之利有死無二豈得先念其私主上欲滅高麗故先誅百濟留兵守之制其心腹雖餘寇充斥而守備甚嚴宜礪兵秣馬擊其不意理無不克既捷之後士卒心安然後分兵據險開張形勢飛表以聞更求益兵朝廷知其有成必命將出師聲援纔接凶醜自殲非直不棄成功實亦永清海表今平壤之軍既還熊津又拔則百濟餘燼不日更興

高麗逋寇何時可滅且今以一城之地居敵中央苟或動足即為擒虜縱入新羅亦為羈客脫不如意悔不可追况福信凶悖殘虐君臣猜離行相屠戮正宜堅守觀變乘便取之不可動也衆從之時百濟王豐與福信等以仁願等孤城無援遣使謂之曰大使等何時西還當遣相從仁願仁軌知其無備忽出擊之拔其支羅城及峴城大山沙井等柵殺獲甚衆分兵守之福信等以真峴城險要加兵守之仁軌伺其稍懈引新羅兵夜傳城

下攀草而上比明入據其城遂通新羅運糧之路仁願
乃奏請益兵詔發淄青萊海之兵七千人以赴熊津福
信專權與百濟王豐浸相猜忌福信稱疾卧於窟室欲
俟豐問疾而殺之豐知之帥親信襲殺福信遣使詣高
麗倭國乞師以拒唐兵

三年秋八月戊申上以海東累歲用兵百姓困於征調
士卒戰溺死者甚衆詔罷三十六州所造船遣司元太
常伯竇德玄等分詣十道問人疾苦黜陟官吏德玄毅

之曾孫也 九月戊午熊津道行軍總管右威衛將軍
孫仁師等破百濟餘衆及倭兵於白江拔其周留城初
劉仁願劉仁軌既克真峴城詔孫仁師將兵浮海助之
百濟王豐南引倭人以拒唐兵仁師與仁願仁軌合軍
勢大振諸將以加林城水陸之衝欲先攻之仁軌曰加
林險固急攻則傷士卒緩之則曠日持久周留城虜之
巢穴羣兇所聚除惡務本宜先攻之若克周留諸城自
下於是仁師仁願與新羅王法敏將陸軍以進仁軌與

別將杜輿扶餘隆將水軍及糧船自熊津入白江以會
陸軍同趣周留城遇倭兵於白江口四戰皆捷焚其舟
四百艘烟炎灼天海水皆赤百濟王豐脫身奔高麗王
子忠勝忠志等帥衆降百濟盡平唯別帥遲受信據任
存城不下初百濟西部人黑齒常之長七尺餘驍勇有
謀略仕百濟為達率兼郡將猶中國刺史也蘇定方克
百濟常之帥所部隨衆降定方繫其王及太子縱兵劫
掠壯者多死常之懼與左右十餘人遁歸本部收集亡

散保任存山結柵以自固旬日間歸附者三萬餘人定
方遣兵攻之常之拒戰唐兵不利常之復取二百餘城
定方不能克而還常之與別部將沙吒相如各據險以
應福信百濟既敗皆帥其衆降劉仁軌使常之相如自
將其衆取任存城仍以糧仗助之孫仁師曰此屬獸心
何可信也仁軌曰吾觀二人皆忠勇有謀敦信重義但
鄉者所託未得其人今正是其感激立效之時不用疑
也遂給其糧仗分兵隨之攻拔任存城遲受信棄妻子

奔高麗詔留劉仁軌將兵鎮百濟召孫仁師劉仁願還
百濟兵火之餘比屋彫殘僵尸滿野仁軌始命瘞骸骨
籍戶口理村聚署官長通道途立橋梁補堤堰復陂塘
課耕桑賑貧乏養孤老立唐社稷頒正朔及廟諱百濟
大悅闔境各安其業然後修屯田儲糗糧訓士卒以圖
高麗劉仁願至京師上問之曰卿在海東前後奏事皆
合機宜復有文理卿本武人何能如是仁願曰此皆劉
仁軌所為非臣所及也上悅加仁軌六階正除帶方州

刺史為築第長安厚賜其妻子遣使齎璽書勞勉之上官
儀曰仁軌遭黜削而能盡忠仁願秉節制而能推賢皆
可謂君子矣

麟德元年冬十月庚辰檢校熊津都督劉仁軌上言臣
伏覩所存戍兵疲羸者多勇健者少衣服貧弊惟思西歸
無心展效臣問以往在海西見百姓人人應募爭欲從
軍或請自辦衣糧謂之義征何為今日士卒如此咸言
今日官府與曩時不同人心亦殊曩時東西征役身沒

王事並蒙敕使弔祭追贈官爵或以死者官爵回授子弟凡度遼海者皆賜勲一轉自顯慶五年以來征人屢經度海官不記錄其死者亦無人誰何州縣每發百姓為兵其壯而富者行錢參逐皆亡匿得免貧者身雖老弱被發即行頃者破百濟及平壤苦戰當是時將帥號令許以勲賞無所不至及達西岸唯聞枷鎖催禁奪賜破勲州縣追呼無以自存公私困弊不可悉言以是昨發海西之日已有逃亡自殘者非獨至海外而然也又

本因征役授勲級以為榮寵而比年出征皆使勲官挽引勞苦與白丁無殊百姓不願從軍率皆由此臣又問曩日士卒留鎮五年尚得支濟今爾等始經一年何為如此單露咸言初發家日惟令備一年資裝今已二年未有還期臣檢校軍士所留衣今冬僅可充事來秋以往全無準擬陛下留兵海外欲殄滅高麗百濟高麗舊相黨援倭人雖遠亦共為影響若無鎮兵還成一國今既資戍守又置屯田所藉士卒同心同德而衆有此議

何望成功自非有所更張厚加慰勞明賞重罰以起士
心若止如今日已前處置恐師衆疲老立效無日通耳
之事或無人為陛下盡言故臣披露肝膽昧死奏陳上
深納其言遣右威衛將軍劉仁願將兵度海以代舊鎮
之兵仍敕仁軌俱還仁軌謂仁願曰國家懸軍海外欲
以經畧高麗其事非易今收穫未畢而軍吏與士卒一
時代去軍將又歸夷人新服衆心未安必將生變不如且
留舊兵漸令收穫辦具資糧節級遣還軍將且留鎮撫

未可還也仁願曰吾前還海西大遭讒謗云吾多留兵
衆謀據海東幾不免禍今日惟知準敕豈敢擅有所為
仁軌曰人臣苟利於國知無不為豈恤其私乃上表陳
便宜自請留鎮海東上從之仍以扶餘隆為熊津都尉
使招輯其餘衆

二年秋七月上命熊津都尉扶餘隆與新羅王法敏釋
去舊怨 八月壬子同盟于熊津城劉仁軌以新羅百
濟耽羅倭國使者浮海西還會祠泰山高麗亦遣太子

福男來侍祠

乾封元年夏五月高麗王蓋蘇文卒長子男生代為莫離支初知國政出巡諸城使其弟男建男產留知後事或謂二弟曰男生惡二弟之逼意欲除之不如先為計二弟初未之信又有告男生者曰二弟恐兄還奪其權欲拒兄不納男生潛遣所親往平壤伺之二弟收掩得之乃以王命召男生男生懼不敢歸男建自為莫離支發兵討之男生走保別城使其子獻誠詣闕求救六

月壬寅以左驍衛大將軍契苾何力為遼東道安撫大
使將兵救之以獻誠為右武衛將軍使為鄉導又以左
金吾衛將軍龐同善營州都督高侃為行軍總管同討
高麗 秋九月龐同善大破高麗兵泉男生帥衆與同
善合詔以男生為特進遼東大都督兼平壤道安撫大
使封玄菟郡公 冬十二月己酉以李勣為遼東道行
軍大總管兼安撫大使以司列少常伯安陸郝處俊副
之以擊高麗龐同善契苾何力並為遼東道行軍副大

總管兼安撫大使如故其水陸諸軍總管并運糧使竇義積獨孤卿雲郭待封等並受勩處分河北諸州租賦悉詣遼東給軍用

二年秋九月辛未李勩拔高麗之新城使契苾何力守之勩初度遼謂諸將曰新城高麗西邊要害不先得之餘城未易取也遂攻之城人師夫仇等縛城主開門降勩引兵進擊一十六城皆下之龐同善高侃尚在新城泉男建遣兵襲其營左武衛將軍薛仁貴擊破之侃進

至金山與高麗戰不利高麗乘勝逐北仁貴引兵橫擊之大破高麗斬首五萬餘級拔南蘇木底蒼巖三城與泉男生軍合郭待封以水軍自別道趣平壤勳遣別將馮師本載糧仗以資之師本船破失期待封軍中飢窘欲作書與勳恐為虜所得知其虛實乃作離合詩以與勳勳怒曰軍事方急何以詩為必斬之行軍管記通事舍人河南元萬頃為釋其義勳乃更遣糧仗赴之萬頃作檄高麗文曰不知守鴨綠之險泉男建報曰謹間命

矣即移兵據鴨綠津唐兵不得度上聞之流萬頃於嶺南郝處俊在高麗城下未及成列高麗奄至軍中大駭處俊據胡床方食乾糲潛簡精銳擊敗之將士服其膽畧

總章元年春二月壬午李勣等拔高麗扶餘城薛仁貴既破高麗於金山乘勝將三千人將攻扶餘城諸將以其兵少止之仁貴曰兵不必多顧用之何如耳遂為前鋒以進與高麗戰大破之殺獲萬餘人遂拔扶餘城扶

餘川中四十餘城皆望風請服侍御史洛陽賈言忠奉使自遼東還上問以軍事言忠對曰高麗必平上曰卿何以知之對曰隋煬帝東征而不克者人心離怨故也先帝東征而不克者高麗未有疊也今高藏微弱權臣擅命蓋蘇文死男建兄弟內相攻奪男生傾心內附為我鄉導彼之情偽靡不知之以陛下明聖國家富強將士盡力以乘高麗之亂其勢必克不俟再舉矣且高麗連年饑饉妖異屢降人心危駭其亡可翹足待也上又

問遼東諸將孰賢對曰薛仁貴勇冠三軍龐同善雖不善鬪而持軍嚴整高侃勤儉自處忠果有謀契必何力沈毅能斷雖頗忌刻而有統御之才然夙夜小心忘身憂國皆莫及李勣也上深然其言泉男建復遣兵五萬人救扶餘城與李勣等遇於薛賀水合戰大破之斬獲三萬餘人進攻大行城拔之秋九月癸巳李勣拔平壤勣既克大行城諸軍出它道者皆與勣會進至鴨綠柵高麗發兵拒戰勣等奮擊大破之追奔二百餘里拔辱

夷城諸城遁逃及降者相繼契苾何力先引兵至平壤
城下勅軍繼之圍平壤月餘高麗王藏遣泉男產帥首
領九十八人持白幡詣勅降勅以禮接之泉男建猶閉
門拒守頻遣兵出戰皆敗男建以軍事委僧信誠信誠
密遣人詣勅請為內應後五日信誠開門勂縱兵登城
鼓譟焚城四月男建自刺不死遂擒之高麗悉平冬
十月李勂將至上命先以高藏等獻于昭陵具軍容奏
凱歌入京師獻于太廟十二月丁巳上受俘于金元殿

以高藏政非已出赦以為司平太常伯負外同正以泉男產為司宰少卿僧信誠為銀青光祿大夫泉男生為右衛大將軍李勣以下封賞有差泉男建流黔州扶餘豐流嶺南分高麗五部百七十六城六十九萬餘戶為九都督府四十二州百縣置安東都護府於平壤以統之擢其酋帥有功者為都督刺史縣令與華人參理以右威衛大將軍薛仁貴檢校安東都護總兵二萬人以鎮撫之丁卯上祀南郊告平高麗以李勣為亞獻己巳

謁太廟

二年高麗之民多離叛者敕徙高麗戶三萬八千二百於江淮之南及山南京西諸州空曠之地留其貧弱者使守安東

咸亨元年夏四月高麗酋長劔牟岑反立高藏外孫安舜為主以左監門大將軍高侃為東州道行軍總管發兵討之安舜殺劔牟岑奔新羅

二年秋七月乙未朔高侃破高麗餘衆於安市城

三年冬十二月高侃與高麗餘衆戰于白水山破之新
羅遣兵救高麗侃擊破之

四年夏閏五月燕山道總管右領軍大將軍李謹行大
破高麗叛者於瓢蘆河之西俘獲數千餘人衆皆奔新
羅時謹行妻劉氏留代奴城高麗引靺鞨攻之劉氏擐
甲帥衆守城久之虜退上嘉其功封燕國夫人謹行靺
鞨人突地稽之子也武力絕人爲衆夷所憚

上元元年春正月壬午以左庶子同中書門下三品劉

仁軌為鷄林道大總管衛尉卿李弼右領軍大將軍李
謹行副之發兵討新羅時新羅王法敏既納高麗叛衆
又據百濟故地使人守之上大怒詔削法敏官爵其弟
右驍衛員外大將軍臨海郡公仁問在京師立以為新
羅王使歸國

二年春二月劉仁軌大破新羅之衆於七重城又使靺
鞨浮海畧新羅之南境斬獲甚衆仁軌引兵還詔以李
謹行為安東鎮撫大使屯新羅之買省城以經畧之三

戰皆捷新羅乃遣使入貢且謝罪上赦之復新羅王法
敏官爵金仁問中道而還改封臨海郡公

儀鳳元年春二月甲戌徙安東都護府於遼東故城先
有華人任安東官者悉罷之徙熊津都督府於建安故
城其百濟戶口先徙徐兗等州者皆置於建安

二年 初劉仁軌引兵自熊津還扶餘隆畏新羅之逼
不敢留尋亦還朝二月丁巳以工部尚書高藏為遼東
州都督封朝鮮王遣歸遼東安輯高麗餘衆高麗先在

諸州者皆遣與藏俱歸又以司農卿扶餘隆為熊津都督封帶方王亦遣歸安輯百濟餘衆仍移安東都護府於新城以統之時百濟荒殘命隆寓居高麗之境藏至遼東謀叛潛與靺鞨通召還徙邛州而死散徙其人於河南隴右諸州貧者留安東城傍高麗舊城沒於新羅餘衆散入靺鞨及突厥隆亦竟不敢還故地高氏扶餘氏遂亡

開耀元年冬十月丁亥新羅王法敏卒遣使立其子政

明

吐蕃請和

唐太宗貞觀八年冬十一月甲申吐蕃贊普棄宗弄讚遣使入貢仍請昏吐蕃在吐谷渾西南近世浸彊蠶食它國土宇廣大勝兵數十萬然未嘗通中國其王稱贊普俗不言姓王族皆曰論官族皆曰尚棄宗弄讚有勇略四鄰畏之上遣使者馮德遐往慰撫之

十二年 初上遣使者馮德遐撫慰吐蕃吐蕃聞突厥

吐谷渾皆尚公主遣使隨德遐入朝多齎金寶奉表求婚上未之許使者還言於贊普棄宗弄讚曰臣初至唐唐待我甚厚許尚公主會吐谷渾王入朝相離間唐禮遂衰亦不許婚弄讚遂發兵擊吐谷渾吐谷渾不能支遁於青海之北民畜多為吐蕃所掠吐蕃進破党項白蘭諸羌帥衆二十餘萬屯松州西境遣使貢金帛云來迎公主尋進攻松州敗都督韓威羌酋闡州刺史別叢卧施諾州刺史把利步利並以州叛歸之連兵不息其

大臣諫不聽而自縊者凡八輩壬寅以吏部尚書侯君
集為當彌道行軍大總管甲辰以右領軍大將軍執失
思力為白蘭道左武衛將軍牛進達為閼水道左領軍
將軍劉簡為洮河道行軍總管督步騎五萬擊之吐蕃
攻城十餘日進達為先鋒九月辛亥掩其不備敗吐蕃
於松州城下斬首千餘級弄讚懼引兵退遣使謝罪因
復請婚上許之

十四年冬閏十月丙辰吐蕃贊普遣其相祿東贊獻金

五千兩及珍玩數百以請昏上許以文成公主妻之
十五年春正月甲戌以吐蕃祿東贊為右衛大將軍上
嘉祿東贊善應對以琅邪公主外孫段氏妻之辭曰臣
國中自有婦父母所聘不可棄也且贊普未得謁公主
陪臣何敢先娶上益賢之然欲撫以厚恩竟不從其志
丁丑命禮部尚書江夏王道宗持節送文成公主于吐
蕃贊普大喜見道宗盡子婿禮慕中國衣服儀衛之美
為公主別築城郭宮室而處之自服紉綺以見公主其

國人皆以赭塗面公主惡之贊普下令禁之亦所革其猜暴之性遣子弟入國學受詩書

二十三年土以吐蕃贊普弄讚為駙馬都尉封西海郡王贊普致書于長孫無忌等云天子初即位臣下有不忠者當勒兵赴國討除之

高宗永徽元年夏五月壬戌吐蕃讚普弄讚卒其嫡子早死立其孫為贊普贊普幼弱政事皆決於國相祿東贊祿東贊性明達嚴重行兵有法吐蕃所以彊大威服氐

羌皆其謀也

顯慶三年冬十月庚申吐蕃贊普來請婚

五年八月吐蕃祿東贊遣其子起政將兵擊吐谷渾以吐谷渾內附故也

龍朔三年夏五月吐蕃與吐谷渾互相攻各遣使上表論曲直更來求援上皆不許吐谷渾之臣素和貴有罪逃奔吐蕃具言吐谷渾虛實吐蕃發兵擊吐谷渾大破之吐谷渾可汗曷鉢與弘化公主帥數千帳棄國走依涼州請徙

居內地上以涼州都督鄭仁泰為清海道行軍大總管帥
右武衛將軍獨孤卿雲辛文陵等分屯涼鄯二州以備吐
蕃六月戊申又以左武衛大將軍蘇定方為安集大使節
度諸軍為吐谷渾之援吐蕃祿東贊屯青海遣使者論仲
琮入見表陳吐谷渾之罪且請和親上不許遣左衛郎將
劉文祥使于吐蕃降璽書責讓之

麟德二年春二月丁卯吐蕃遣使入見請復與吐谷渾和
親仍求赤水地畜牧上不許

咸亨元年夏四月吐蕃陷西域十八州又與于闐襲龜
茲撥換城陷之罷龜茲于闐焉耆踈勒四鎮辛亥以右
衛大將軍薛仁貴為邏娑道行軍大總管左衛員外大
將軍阿史那道真左衛將軍郭待封副之以討吐蕃且
援送吐谷渾還故地秋八月郭待封先與薛仁貴並
列及征吐蕃趾居其下仁貴所言待封多違之軍至大
非川將趣烏海仁貴曰烏海險遠軍行甚難輜重自隨
難以趨利宜留二萬人為兩柵於大非嶺上輜重悉置

柵內吾屬帥輕銳倍道兼行掩其未備破之必矣仁貴
帥所部前行擊吐蕃於河口大破之斬獲甚衆進屯烏
海以俟待封待封不用仁貴策將輜重徐進未至烏海
遇吐蕃二十餘萬待封軍大敗還走悉棄輜重仁貴退
屯大非川吐蕃相論欽陵將兵四十餘萬就擊之唐兵
大敗死傷略盡仁貴待封與阿史那道真並脫身免與
欽陵約和而還敕大司憲樂彥璋即軍中按其敗狀械
送京師三人皆免死除名欽陵祿東贊之子也與弟贊

婆悉多于勃論皆有才略祿東贊卒欽陵代之秉政三弟將兵居外鄰國畏之 閏九月甲寅以左相姜恪為涼州道行軍大總管以禦吐蕃

三年夏四月吐蕃遣其大臣仲琮入貢上問以吐蕃風俗對曰吐蕃地薄氣寒風俗朴魯然法令嚴整上下一心議事常自下而起因人所利而行之斯所以能持久也上詰以吞滅吐谷渾敗薛仁貴寇逼涼州事對曰臣受命貢獻而已軍旅之事非所聞也上厚賜而遣之癸

未遣都水使者黃仁素使于吐蕃

上元二年春正月辛未吐蕃遣其大臣論吐渾彌來請和且請與吐谷渾復修隣好上不許

儀鳳元年春閏三月吐蕃寇鄯廓河芳等州敕左監門衛中郎令狐智通發興鳳等州兵以禦之己卯詔以吐蕃犯塞停封中獄乙酉以洛州牧周王顯為洮州道行軍元帥將工部尚書劉審禮等十一總管并州大都督相王輪為涼州道行軍元帥將左衛大將軍契苾何力

等以討吐蕃二王皆不行 秋八月乙未吐蕃寇疊州
二年夏五月吐蕃寇扶州之臨河鎮擒鎮將杜孝昇令
齎書說松州都督武居寂使降孝昇固執不從吐蕃軍
還捨孝昇而去孝昇復帥餘衆拒守詔以孝昇為遊擊
將軍

冬十二月乙卯詔大發兵討吐蕃

三年秋七月李敬玄奏破吐蕃於龍支 九月丙寅李
敬玄將兵十八萬與吐蕃將論欽陵戰於青海之上兵

敗工部尚書左衛大將軍彭城僖公劉審禮為吐蕃所虜時審禮將前軍深入頓于濠所為虜所攻敬玄懦怯按兵不救間審禮戰沒狼狽還走頓于承風嶺阻泥溝以自固虜屯兵高崗以壓之左領軍員外將軍黑齒常之夜帥敢死之士五百人襲擊虜營虜衆潰亂其將跋地設引兵遁去敬玄乃收餘衆還鄯州審禮諸子自縛詣闕請入吐蕃贖其父敕聽次子易從詣吐蕃省之比至審禮已病卒易從晝夜號哭不絕聲吐蕃哀之還其

尸易從徒跣負之以歸上嘉黑齒常之之功擢拜左武衛將軍充河源軍副使李敬玄之西征也監察御史原武婁師德應猛士詔從軍及敗敕師德收集散亡軍乃復振因命使于吐蕃吐蕃將論贊婆迎之赤嶺師德宣導上意諭以禍福贊婆甚悅為之數年不犯邊師德遷殿中侍御史充河源軍司馬兼知營田事上以吐蕃為憂悉召侍臣謀之或欲和親以息民或欲嚴設守備俟公私富實而討之或欲亟發兵擊之議竟不決賜食而

遣之太學生宋城魏元忠上封事言禦吐蕃之策以為
理國之要在文與武今言文者則以辭華為首而不及
經綸言武者則以騎射為先而不知方略是皆何益於
理亂哉故陸機著辨亡之論無救河梁之敗養由基射
穿七札不濟鄢陵之師此已然之明效也古語有之人
無常俗政有理亂兵無彊弱將有巧拙故選將當以智
略為本勇力為末今朝廷用人類取將門子弟及死事
之家彼皆庸人豈足當閫外之任李左車陳湯呂蒙孟

觀皆出貧賤而立殊功未聞其家代為將也夫賞罰者
軍國之切務苟有功不賞有罪不誅雖堯舜不能以致
理議者皆云近日征伐虛有賞格而無事實蓋由小才
之吏不知大體徒惜勲庸恐虛倉庫不知士不用命所
損幾何黔首雖微不可欺罔豈得懸不信之令設虛賞
之科而望其立功乎自蘇定方征遠東李勣破平壤賞
絕不行勲仍淹滯不聞斬一臺郎戮一令史以謝勲人
大非川之敗薛仁貴郭待封等不即重誅曷使早誅仁

貴等則自餘諸將豈敢失利於後哉臣恐吐蕃之平非旦夕可冀也又出師之要全資馬力臣請開畜馬之禁使百姓皆得畜馬若官軍大舉委州縣長吏以官錢增價市之則皆為官有彼胡虜恃馬力以為彊若聽人間市而畜之乃是損彼之彊為中國之利也先是禁百姓畜馬故元忠言之上善其言召見令直中書省仗內供奉

調露元年春二月壬戌吐蕃贊普卒子器弩悉弄立生

八年矣時器弩悉弄與其舅勰薩若詣羊同發兵有弟
生六年在論欽陵軍中國人畏欽陵之彊欲立之欽陵
不可與薩若共立器弩悉弄上聞贊普卒嗣主未定命
裴行儉乘間圖之行儉曰欽陵為政大臣輯睦未可圖
也乃止

冬十月癸亥吐蕃文成公主遣其大臣論塞調傍來告
喪并請和親上遣即將宋令文詣吐蕃會贊普之葬
永隆元年秋七月吐蕃寇河源左武衛將軍黑齒常之

擊却之擢常之為河源軍經略大使常之以河源衝要
欲加兵戍之而轉輸險遠乃廣置烽戍七十餘所開屯
田五千餘頃歲收五百餘萬石由是戰守有備焉先是
劔南募兵於茂州西南築安戎城以斷吐蕃通蠻之路
吐蕃以先羌為鄉導攻陷其城以兵據之由是西洱諸
蠻皆降于吐蕃吐蕃盡據羊同党項及諸羌之地東接
涼松茂窩等州南隣天竺西陷龜茲踈勒等四鎮北抵
突厥地方萬餘里諸胡之盛莫與為比 冬十月丙午

文成公主薨于吐蕃

開耀元年夏五月己丑河源道經略大使黑齒常之將兵擊吐蕃論贊婆於良非川破之收其糧畜而還常之在軍七年吐蕃深畏之不敢犯邊

永淳元年秋七月吐蕃將論欽陵寇拓松翼等州詔左驍衛即將李孝逸右衛即將衛蒲山發秦渭等州兵分道禦之

冬十月吐蕃入寇河源軍軍使婁師德將兵擊之於白

水澗八戰八捷上以師德為比部員外郎左驍衛即將
河源軍經略副使曰卿有文武材勿辭也

則天皇后垂拱元年冬十一月癸卯命天官尚書韋待
價為燕然道行軍大總管以討吐蕃

三年冬十一月太后欲遣韋待價將兵擊吐蕃鳳閣侍
郎韋方質奏請如舊制遣御史監軍太后曰古者明君
遣將聞外之事悉以委之比聞御史監軍軍中事無大
小皆須承稟以下制上非令典也且何以責其有功遂

罷之

永昌元年夏五月丙辰命文昌右相韋待價為安息道
行軍大總管擊吐蕃 韋待價軍至寅識迦河與吐蕃
戰大敗會大雪糧運不繼待價既無將領之才狼狽失
據士卒凍餒死亡甚衆乃引軍還太后大怒丙子待價
除名流繡州斬副大總管安西大都護閻溫古安西副
都護唐休璟收其餘衆撫安西土太后以休璟為西州
都督

天授二年夏五月以岑長倩為武威道行軍大總管擊吐蕃中道召還軍竟不出

長壽元年春二月己亥吐蕃党項部落萬餘人內附分置十州 夏五月吐蕃酋長曷蘇帥部落請內附以右玉鈐衛將軍張玄遇為安撫使將精卒二萬迎之六月軍至大渡水西曷蘇事洩為國人所擒別部酋長咎捶帥羌蠻八十餘人內附玄遇以其部落置萊川州而還 初新豐王孝傑從劉審禮擊吐蕃為副總管與審

禮皆沒於吐蕃贊普見孝傑泣曰貌類吾父厚禮之後
竟得歸累遷右鷹揚衛將軍孝傑久在吐蕃知其虛實
會西州都督唐休璟請復取龜茲于間疎勒碎葉四鎮
敕以孝傑為武威軍總管與左武衛大將軍阿史那忠
節將兵擊吐蕃冬十月丙戌大破吐蕃復取四鎮置安
西都護於龜茲發兵戍之

延載元年春二月武威道總管王孝傑破吐蕃敕論贊
力突厥可汗倭子等於冷泉及大嶺各三萬餘人碎葉

鎮守使韓思忠破泥熟俟斤等萬餘人

天冊萬歲元年秋七月辛酉吐蕃寇臨洮以王孝傑為肅邊道行軍大總管以討之

萬歲通天元年春正月甲寅以婁師德為肅邊道行軍副總管擊吐蕃 三月壬寅王孝傑婁師德與吐蕃將論欽陵贊婆戰於素羅汗山唐兵大敗孝傑坐免為庶人師德貶原州員外司馬師德因署移牒驚曰官爵盡無邪既而曰亦善亦善不復介意 秋九月吐蕃復遣

使請和親太后遣右武衛冑曹參軍貴鄉郭元振往察其宜吐蕃將論欽陵請罷安西四鎮戍兵并求分十姓突厥之地元振曰四鎮十姓與吐蕃種類本殊今請罷唐兵豈非有兼并之志乎欽陵曰吐蕃苟貪土地欲為邊患則東侵甘涼豈肯規利於萬里之外邪乃遣使者隨元振入請之朝廷疑未決元振上疏以為欽陵求罷兵割地此乃利害之機誠不可輕舉措也今若直拒其善意則為邊患必深四鎮之利遠甘涼之害近不可不

深圖也宜以計緩之使其和望未絕則善矣彼四鎮十姓吐蕃之所甚欲也而青海吐谷渾亦國家之要地也今報之宜曰四鎮十姓之地本無用於中國所以遣兵戍之欲以鎮撫西域分吐蕃之勢使不得併力東侵也今若果無東侵之志當歸我吐谷渾諸部及青海故地則五俟斤部亦當以歸吐蕃如此則足以塞欽陵之口而亦未與之絕也若欽陵小有乖違則曲在彼矣且四鎮十姓款附歲久今未

察其情之向背事之利害遙割而棄之恐傷諸國之心
非所以御四夷也太后從之元振又上言吐蕃百姓疲於
徭戍早願和親欽陵利於統兵專制獨不欲歸疑若國家
歲發和親使而欽陵常不從命則彼國之人怨欽陵日深望
國恩日甚設欲大舉其徒固亦難矣斯亦離間之漸可使
其上下猜阻禍亂內興矣太后深然之元振名震以字行
聖厯二年 初吐蕃贊普器弩悉弄尚幼論欽陵兄弟
用事皆有勇略諸胡畏之欽陵居中秉政諸弟握兵分

據方面贊婆常居東邊為中國患者三十餘年器弩悉
弄浸長陰與大臣論巖謀誅之會欽陵出外贊普詐云
出畋集兵執欽陵親黨二千餘人殺之遣使召欽陵兄
弟欽陵等舉兵不受命贊普將兵討之欽陵兵潰自殺
夏四月贊婆帥所部千餘人來降太后命右武衛鎧曹
參軍郭元振與河源軍大使夫蒙令卿將騎迎之以贊
婆為將迎歸德王欽陵子弓仁以所統吐谷渾七千帳
來降拜左玉鈐衛將軍酒泉郡公 冬十月丁亥論贊

婆至都太后寵待賞賜甚厚以為右衛大將軍使將其
衆守洪源谷

久視元年秋閏七月丁酉吐蕃將麴莽布支寇涼州圍
昌松隴右諸軍大使唐休璟與戰於洪源谷麴莽布支
兵甲解華休璟謂諸將曰諸論既死麴莽布支新為將
不習軍事諸貴臣子弟皆從之望之雖如精銳實易與
耳請為諸君破之乃被甲先陷陳六戰皆捷吐蕃大奔
斬首二千五百級獲二裨將而還 庚戌以魏元忠為

隴右諸軍大使擊吐蕃

長安二年秋九月己卯吐蕃遣其臣論彌薩來求和

癸未宴論彌薩於麟德殿時涼州都督唐休璟入朝亦
預宴彌薩屢窺之太后問其故對曰洪源之戰此將軍
猛厲無敵故欲識之太后擢休璟為右武威金吾二衛
大將軍休璟練習邊事自碣石以西踰四鎮綿亘萬里
山川要害皆能記之冬十月戊申吐蕃贊普將萬餘
人寇茂州都督陳大慈與之四戰皆破之斬首千餘級

三年夏四月吐蕃遣使獻馬千匹金二千兩以求昏
吐蕃南境諸部皆叛贊普器弩悉弄自將擊之卒於軍
中諸子爭立久之國人立其子棄隸贊為贊普生七年
矣

中宗景龍元年春三月庚子吐蕃遣其大臣悉蕭熱入
貢夏四月辛巳以上所養雍王守禮女金城公主妻
吐蕃贊普

三年冬十一月乙亥吐蕃贊普遣其大臣尚贊咄等千

餘人迎金城公主

睿宗景雲元年春正月上命紀處訥送金城公主適吐蕃處訥辭又命趙彥昭彥昭亦辭丁丑命左驍衛大將軍楊矩送之己卯上自送公主至始平二月癸未還宮公主至吐蕃贊普為之別築城以居之

玄宗開元元年冬十二月甲午吐蕃遣其大臣來求和二年夏五月己酉吐蕃相全達延遺宰相書請先遣解琬至河源正二國封疆然後結盟琬嘗為朔方大總管

故吐蕃請之前此琬以金紫光祿大夫致仕復召拜左散騎常侍而遣之又命宰相復坐達延書招懷之琬上言吐蕃必陰懷叛計請預屯兵十萬於秦渭等州以備之六月丙寅吐蕃使其宰相尚飲藏來獻盟書秋八月乙亥吐蕃將坐達延乞力徐帥衆十萬寇臨洮軍蘭州至于渭源掠取牧馬命薛訥白衣攝左羽林將軍為隴右防禦使以右驍衛將軍常樂郭知運為副使與太僕少卿王晙帥兵擊之辛巳大

募勇士詣河隴就訥教習初鄯州都督楊矩以九曲之地與吐蕃其地肥饒吐蕃就之畜牧因以入寇矩悔懼自殺冬十月吐蕃復寇渭原丙辰上下詔欲親征發兵十餘萬人馬四萬匹甲子薛訥與吐蕃戰於武街大破之時太僕少卿隴右羣牧使王晙帥所部二千人與訥會擊吐蕃坐達延將吐蕃十萬屯大來谷晙選勇士七百衣胡服夜襲之多置鼓角於其後五里前軍遇敵大呼後人鳴鼓角以應之擄以

為大軍至驚懼自相殺傷死者萬計訥時在武街去
大來谷二十里虜軍塞其中間暖復夜出兵襲之虜
大潰始得與訥軍合同追犇至洮水復戰於長城堡
又敗之前後殺獲數萬人豐安軍使王海賓戰死乙丑
敕罷親征戊辰姚崇盧懷慎等奏頃者吐蕃以河為境
神龍中尚公主遂踰河築城置獨山九曲兩軍去積石
三百里又於河上造橋今吐蕃既叛宜毀橋拔城從之
以王海賓之子忠嗣為朝散大夫尚輦奉御養之宮中

乙酉命左驍衛郎將慰金城公主吐蕃遣其大臣宗俄因弔至洮水請和用敵國禮上不許自是連歲犯邊

四年春二月吐蕃圍松州 癸酉松州都督孫獻襲擊吐蕃於城下大破之 秋七月吐蕃復請和上許之

五年秋七月壬寅隴右節度使郭知運大破吐蕃於九曲

六年冬十一月戊辰吐蕃奉表請和乞舅甥親署誓文及令彼此宰相皆著名於其上

七年夏六月戊辰吐蕃復遣使請上親署誓文上不許
曰昔歲誓約已定苟信不由衷亟誓何益

十年秋八月癸未吐蕃圍小勃律王沒謹忙謹忙求救
于北庭節度使張嵩曰勃律唐之西門勃律亡則西域
皆為吐蕃矣嵩乃遣疏勒副使張思禮將蕃漢步騎四
千人救之晝夜倍道與謹忙合擊吐蕃大破之斬獲數
萬自是累歲吐蕃不敢犯邊

十五年春正月辛丑涼州都督王君奭破吐蕃於青海

之西初吐蕃自恃其彊致書用敵國禮辭指悖慢上意
常怒之張說言於上曰吐蕃無禮誠宜誅夷但連兵十
餘年甘涼河鄯不勝其弊雖師屢捷所得不償所亡聞
其悔過求和願聽其款服以紓邊人上曰俟吾與王君
奐議之說退謂源乾曜曰君奐勇而無謀常思僥幸若
二國和親何以為功吾言必不用矣及君奐入朝果請
深入討之去冬吐蕃大將悉諾邏寇大斗谷進攻甘州
焚掠而去君奐度其兵疲勒兵躡其後會大雪虜凍死

者甚衆自積石軍西歸君奭先遣人間道入虜境燒道
旁草悉諾邏至大非川欲休士馬而野草皆盡馬死過
半君奭與泰州都督張景順追之及於青海之西衆冰
而度悉諾邏已去破其後軍獲其輜重羊馬萬計而還
君奭以功遷左羽林大將軍拜其父壽為少府監致仕
上由是益事邊功 秋九月丙子吐蕃大將悉諾邏恭
祿及燭龍莽布支攻陷瓜州執刺史田元獻及河西節
度使王君奭之父進攻玉門軍縱所虜俘使歸涼州謂

君奭曰將軍常以忠勇許國何不一戰君奭登城西望而泣竟不敢出兵莽布支別攻常樂縣縣令賈師順帥衆拒守及瓜州陷悉諾邏悉兵會攻之旬餘日吐蕃力盡不能克使人說降之不從吐蕃曰明府既不降宜敎城中財贍吾當退師順請脫士卒衣悉諾邏知無財乃引去毀瓜州城師順遽開門收器械修守備虜果復遣精騎還視城中知有備乃去師順岐州人也 閏月庚子吐蕃贊普與突騎施蘇祿圍安西城安西副大都護

趙頤員擊破之。王君奩帥精騎邀吐蕃使者於肅州，還至甘州，南翬筆驛回紇司馬護輸伏兵突起殺君奩。辛巳，以左金吾衛大將軍信安王禕為朔方節度等副大使，禕恪之孫也。以朔方節度使蕭嵩為河西節度等副大使。時王君奩新敗，河隴震駭，引刑部員外郎裴寬為判官，與君奩判官牛仙客俱掌軍政，人心浸安。寬，淮之從弟也。仙客本鶉觚小吏，以才幹軍功累遷至河西節度判官。為君奩腹心，嵩又奏以建康軍使河北張守

珪為瓜州刺史帥餘衆築故城板榦裁立吐蕃猝至城中相顧失色莫有鬪志守珪曰彼衆我寡又瘡痍之餘不可以矢刃相持當以奇計取勝乃於城上置酒作樂虜疑其有備不敢攻而退守珪縱兵擊之虜敗走守珪乃修復城市收合流散皆復舊業朝廷嘉其功以瓜州為都督府以守珪都督悉諾邏威名甚盛蕭嵩縱反間於吐蕃云與中國通謀贊普召而誅之吐蕃由是少衰冬十二月戊寅制以吐蕃為邊患令隴右道及諸軍

團兵五萬六千人河西道及諸軍團兵四萬人又徵關
中兵萬人集臨洮朔方兵二萬人集會州防秋至冬初
無寇而罷伺虜入寇互出兵腹背擊之

十六年秋七月吐蕃大將悉末朗寇瓜州都督張守珪
擊走之乙巳河西節度使蕭嵩隴右節度使張忠亮大
破吐蕃於渴波谷忠亮追之拔其大莫同城擒獲甚衆
焚其駱駝橋而還 八月辛卯右金吾將軍杜賓客破
吐蕃于祁連城下時吐蕃復入寇蕭嵩遣賓客將彊弩

四千擊之戰自辰至暮吐蕃大潰獲其大將一人虜散走投山哭聲四合

十七年春三月瓜州都督張守珪沙州刺史賈思順擊吐蕃大同軍大破之甲寅朔方節度使信安王禕攻吐蕃石堡城拔之初吐蕃陷石堡城留兵據之侵擾河右上命禕與河西隴右同議攻取諸將咸以為石堡據險而道遠攻之不克將無以自還且宜按兵觀釁禕不聽引兵深入急拔之仍分兵據守要害令虜不得前有

是河隴諸軍遊奕拓境千餘里上聞大悅更命石堡城
曰振武軍

十八年夏五月吐蕃遣使致書于境上求和 秋九月
吐蕃兵數敗而懼乃求和親忠王友皇甫惟明因奏事
從容言和親之利上曰贊普嘗遺吾書悖慢此何可捨
對曰贊善當開元年之初年尚幼穉安能為此書殆邊
將詐為之欲以激怒陛下耳夫邊境有事則將吏得以
因緣盜匿官物妄述功狀以取勲爵此皆姦臣之利非

國家之福也兵連不解日費千金河西隴右由茲因敝
陛下誠命一使往視公主因與贊普面相約結使之稽
顙稱臣永息邊患豈非御夷狄之長策乎上悅命惟明
與內侍張元方便于吐蕃贊普大喜悉出貞觀以來所
得敕書以示惟明冬十月遣其大臣論名悉獵隨惟明
入貢表稱甥世尚公主義同一家中間張玄表等先興
兵寇鈔遂使二境交惡甥深識尊卑安敢失禮正為遣
將交構致獲罪於舅屢遣使者入朝皆為邊將所遏今

蒙遠降使臣來視公主甥不勝喜荷儻使復修舊好死
無所恨自是吐蕃復款附

十九年春正月辛未遣鴻臚卿崔琳使於吐蕃琳神慶
之子也吐蕃使者稱公主求毛詩春秋禮記正字于休
烈上疏以為東平王漢之懿親求史記諸子漢猶不與
況吐蕃國之寇讎今資之以書使知用兵權略愈生變
詐非中國之利也事下中書門下議之裴光庭等奏吐
蕃聾昧頑嚚久叛新服因其有請賜以詩書庶使之漸

陶聲教化流無外休烈徒知書有權畧變詐之語不知忠信禮義皆從書出也上曰善遂與之休烈志寧之玄孫也秋九月辛未吐蕃遣其相論尚它碑入見

二十一年春二月丁酉金城公主請立碑於赤嶺以分唐與吐蕃之境許之

通鑑紀事本末卷二十九中

欽定四庫全書

史部

通鑑紀事本末卷

二十九下
三十一上

詳校官編修臣程槐

編修臣裴謙覆勘

總校官檢討臣何思鈞
校對官中書臣高中

謄錄監生臣夏維翰

欽定四庫全書

通鑑紀事本末卷二十九下

宋 袁樞 撰

突厥叛唐

唐高宗麟德元年春正月甲子改雲中都護府為單于
大都護府以殷王旭輪為單于大都護初李靖破突厥
遷三百帳于雲中城阿史德氏為其長至是部落漸衆
阿史德氏詣闕請如胡法立親王為可汗以統之上召

見謂曰今之可汗古之單于也故更為單于都護府而使殷王遙領之

調露元年冬十月單于大都護府突厥阿史德溫傳奉職二部俱反立阿史那泥熟匐為可汗二十四州酋長皆叛應之衆數十萬遣鴻臚卿單于大都護府長史蕭嗣業左領軍衛將軍花大智右千牛衛將軍李景嘉等將兵討之嗣業等先戰屢捷因不設備會大雪突厥夜襲其營嗣業狼狽拔營走衆遂大亂為虜所敗死者不

可勝數大智景嘉引步兵且行且戰得入單于都護府
嗣業滅死流桂州大智景嘉等並免官突厥寇定州刺
史霍王元軌命開門偃旗虜疑有伏懼而宵遁州人李
嘉運與虜通謀事泄上令元軌窮其黨與元軌曰疆寇
在境人心不安若多所逮繫是驅之使叛也乃獨殺嘉
運餘無所問因自劾違制上覽表大喜謂使者曰朕亦
悔之向無王失定州矣自是朝廷有大事上多密敕問
之壬子遣左金吾衛將軍曹懷舜屯井陘右武衛將軍

崔獻屯龍門以備突厥突厥扇誘奚契丹侵掠營州都督周道務遣戶曹始平唐休璟將兵擊破之十一月癸未上宴裴行儉謂之曰卿有文武兼資今授卿二職乃除禮部尚書兼檢校右衛大將軍甲辰以行儉為定襄道行軍大總管將兵十八萬并西軍檢校豐州都督程務挺東軍幽州都督李文暉總三十餘萬以討突厥並受行儉節度務挺名振之子也

永隆元年春三月裴行儉大破突厥於黑山擒其酋長

奉職可汗泥熟匄為其下所殺以其首來降初行儉行至朔州謂其下曰用兵之道撫士貴誠制敵尚詐前日蕭嗣業糧運為突厥所掠士卒凍餒故敗今突厥必復為此謀宜有以詐之乃詐為糧車三百乘每車伏壯士五人各持陌刀勁弩以羸兵數百為之援且伏精兵於險要以待之虜果至羸兵棄車散走虜驅車就水草解鞍牧馬欲取糧壯士自車中躍出擊之虜驚走復為伏兵所邀殺獲殆盡自是糧運行者虜莫敢近軍至單于

府北抵暮下營掘堑已周行儉遽命移就高岡諸將皆
言士卒已安堵不可復動行儉不從趣使移是夜風雨暴
至前所營地水深丈餘諸將驚服問其故行儉笑曰自
今但從我命不必問其所由知也奉職既就擒餘黨走
保狼山詔戶部尚書崔知悌馳傳詣定襄宣慰將士止
區處餘寇行儉引軍還 秋七月突厥餘衆圍雲州代
州都督竇懷愁右領軍中郎將程務挺將兵擊破之
開耀元年春正月突厥寇原慶等州乙亥遣右衛將軍

李知十等將兵屯涇慶二州以備突厥 裴行儉軍既還突厥阿史那伏念復自立為可汗與阿史德溫傳連兵為寇癸巳以行儉為定襄道大總管以右武衛將軍曹懷舜幽州都督李文暕為副將討之 三月曹懷舜與裨將竇義昭將前軍擊突厥或告阿史那伏念與阿史德溫傳在累沙北左右纔二十騎以下可徑往取也懷舜等信之留老弱於瓠盧泊帥輕銳倍道進至黑沙無所見人馬疲頓乃引兵還會薛延陀部落欲西詣伏

念遇懷舜軍因請降懷舜等引兵徐還至長城北遇溫傳
小戰各引去至橫水遇伏念懷舜義昭與李文暕及裨
將劉敬同四軍合為方陳且戰且行經一日伏念乘便
風擊之軍中擾亂懷舜等棄軍走軍遂大敗死者不可
勝數懷舜等收散卒斂金帛以賂伏念與之約和殺牛
為盟伏念北去懷舜等乃得還 夏五月丙戌懷舜免
死流嶺南 秋閏七月裴行儉軍於代州之陘口多縱
反間由是阿史那伏念與阿史德溫傳浸相猜貳伏念

留妻子輜重於金牙山以輕騎襲曹懷舜行儉遣裨將
何迦密自通漢道程務挺自石地道掩取之伏念與曹
懷舜等約和而還比至金牙山失其妻子輜重士卒多
疾疫乃引兵北走保細沙行儉又使副總管劉敬同程
務挺等將單于府兵追躡之伏念請執溫傳以自效然
尚猶豫又自恃道遠唐兵必不能至不復設備敬同等
軍到伏念狼狽不能整其衆遂執溫傳從間道詣行儉
降候騎告以烟塵漲天而至將士皆震恐行儉曰此乃

伏念執溫傳來降非他盜也然受降如受敵不可無備
乃命嚴備遣單于使迎前勞之少選伏念果帥酋長縛
溫傳詣軍門請罪行儉盡平突厥餘黨以伏念溫傳歸
京師冬十月壬戌裴行儉等獻定襄之俘乙丑改元
丙寅斬阿史那伏念阿史德溫傳等五十四人於都市
初行儉許伏念以不死故降裴疾行儉之功奏言伏
念為副將張處勗程務挺所逼又迴紇等自磧北南向
逼之窮窘而降耳遂誅之行儉歎曰渾濬爭功古今所

耻但恐殺降無復來者因稱疾不出

永淳元年突厥餘黨阿史那骨篤祿阿史德元珍等招
集亡散據黑沙城反入寇并州及單于府之北境殺嵐
州刺史王德茂又領軍衛將軍檢校代州都督薛仁貴
將兵擊元珍於雲州虜問唐大將為誰應之曰薛仁貴
虜曰吾聞仁貴流象州死久矣何以紹我仁貴免胄示
之面虜相顧失色下馬列拜稍稍引去仁貴因奮擊大
破之斬首萬餘級捕虜二萬餘人

弘道元年春二月庚午突厥寇定州刺史霍王元軌擊却之乙亥復寇媯州三月庚寅阿史那骨篤祿阿史德元珍圍單于都護府執司馬張行師殺之遣勝州都督李崇義將兵分道救之夏五月乙丑突厥阿史那骨篤祿等寇蔚州殺刺史李思儉豐州都督崔智辯將兵邀之於朝那山北兵敗為虜所擒朝議欲廢豐州遷其百姓於靈夏豐州司馬唐休璟上言以為豐州阻河為固居賊衝要自秦漢已來列為郡縣土宜耕牧隋季喪

亂遷百姓於寧慶二州致胡虜深侵以靈夏為邊貞觀
之末募人實之西北始安今廢之則河濱之地復為賊
有靈夏等州人不安業非國家之利也乃止 六月突
厥別部寇掠嵐州偏將楊玄基擊走之 冬十一月戊
戌以右武衛將軍程務挺為單于道安撫大使招討阿
史那骨篤祿等

則天皇后光宅元年秋七月突厥阿史那骨篤祿等寇
朔州 九月以左武衛大將軍程務挺為單于道安撫

金史卷之二十一
卷二十九下
大使以備突厥

垂拱元年春二月突厥阿史那骨篤祿等數寇邊以左
玉鈐衛中郎將淳于處平為陽曲道行軍總管擊之
夏四月癸未突厥寇代州淳于處平引兵救之至忻州
為突厥所敗死者五千餘人

二年秋九月突厥入寇左鷹揚衛大將軍黑齒常之拒
之至兩井遇突厥三千餘人見唐兵皆下馬擐甲常之
以二百餘騎衝之皆棄甲走日暮突厥大至常之令營

中然火東南又有火起虜疑有兵相應遂夜遁

三年春二月丙辰突厥骨篤祿等寇昌平命左鷹揚大將軍黑齒常之帥諸軍討之秋七月突厥骨篤祿元珍寇朔州遣燕然道大總管黑齒常之擊之以右鷹揚大將軍李多祚為之副大破突厥於黃花堆追奔四十餘里突厥皆散走磧北多祚世為靺鞨酋長以軍功得入宿衛黑齒常之每得賞賜皆分將士有善馬為軍士所損官屬請答之常之曰柰何以私馬答官兵乎卒不

問冬十月庚子右監門衛中郎將爨寶璧與突厥骨
篤祿元珍戰全軍皆沒寶璧輕騎遁歸寶璧見黑齒常
之有功表請窮追餘寇詔與常之計議遙為聲援寶璧
欲專其功不待常之引精兵萬三千人先行出塞二千
餘里掩擊其部落既至又先遣人告之使得嚴備與戰
遂敗太后誅寶璧改骨篤祿曰不卒祿

永昌元年夏五月己巳以僧懷義為新平軍大總管北
討突厥行至紫河不見虜於單于臺刻石紀功而還

秋九月壬子以僧懷義為新平道行軍大總管將兵二十萬以討突厥骨篤祿

延載元年春正月突厥可汗骨篤祿卒其子幼弟默啜自立為可汗臘月甲戌默啜寇靈州 二月庚午以僧

懷義為代北道行軍大總管以討默啜 三月甲申以

鳳閣舍人蘇味道為鳳閣侍郎同平章事李昭德檢校內史更以僧懷義為朔方道行軍大總管以李昭德為長史蘇味道為司馬帥契苾明曹仁師沙吒忠義等十

八將軍以討默啜未行虜退而止昭德嘗與懷義議事失其旨懷義撻之昭德惶懼請罪

天冊萬歲元年正月丙午以王孝傑為朔方道行軍總管擊突厥冬十月突厥默啜遣使請降太后喜冊授左衛大將軍歸國公

萬歲通天元年秋九月丁巳突厥寇涼州執都督許欽明欽明紹之曾孫也時出按部突厥數萬奄至城下欽明拒戰為所虜突厥默啜請為太后子并為其女求婚

悉歸河西降戶帥其部衆為國討契丹太后遣豹韜衛
大將軍閻知微左衛郎將攝司賓卿田歸道冊授默啜
左衛大將軍遷善可汗知微立德之孫歸道仁會之子
也冬十月辛卯契丹李盡忠卒孫萬榮代領其衆突
厥默啜乘間襲松漠虜盡忠萬榮妻子而去太后進拜
默啜為頡跌利施大單于立功報國可汗

神功元年春正月突厥默啜寇靈州以許欽明自隨欽
明至城下大呼求羹醬梁米及墨意欲城中選良將引

精兵夜襲虜營而城中無諭其意者癸亥突厥默噶寇
勝州平狄軍副使安道買擊破之三月間知微田歸
道同使突厥毋默噶為可汗知微中道遇默噶使者輒
與之緋袍銀帶且上言虜使至都宜大為供張歸道上
言突厥背誕積年今方悔過宜待聖恩寬宥今知微擅
與之袍帶使朝廷無以復加宜令反初服以俟朝恩又
小虜使臣不足大為供張太后然之知微見默噶舞蹈
吮其靴鼻歸道長揖不拜默噶囚歸道將殺之歸道辭

色不撓責其無厭為陳禍福阿波達干元珍曰大國使
者不可殺也默啜怒稍解但拘留不遣初咸亨中突厥
有降者皆處之豐勝靈夏朔代六州至是默啜求六州
降戶及單于都護府之地并穀種繒帛農器鐵太后不
許默啜怒言辭悖慢姚璿楊再思以契丹未平請依默
啜所求給之麟臺少監知鳳閣侍郎贊皇李嶠曰戎狄
貪而無信此所謂借寇兵資盜糧也不如治兵以備之
璿再思固請與之乃悉驅六州降戶數千帳以與默啜

并給穀種四萬斛雜絲五萬段農器三千事鐵數萬斤
并許其昏默歟由是益彊田歸道始得還與閭知微爭
論於太后前歸道以為默歟必負約不可恃和親宜為
之備知微以為和親必可保 冬閏十月甲寅以幽州
都督狄仁傑為鸞臺侍郎同平章事仁傑上疏以為天
生四夷皆在先王封略之外故東拒滄海西阻流沙北
橫大漠南阻五嶺此天所以限夷狄而隔中外也自典
籍所記聲教所及三代不能至者國家盡兼之矣詩人

矜薄伐於太原美化行於江漢則三代之遠裔皆國家
之域中也若乃用武荒外邀功絕域竭府庫之實以爭
不毛之地得其人不足增賦獲其土不可耕織苟求冠
帶遠夷之稱不務固本安人之術此秦皇漢武之所行
非五帝三王之事業也始皇窮兵極武務求廣地死者
如麻致天下潰叛漢武征伐四夷百姓困窮盜賊蜂起
末年悔悟息征罷役故能為天所祐近者國家頻歲出
師所費滋廣西戍四鎮東戍安東調發日加百姓虛弊

今關東飢饉蜀漢逃亡江淮已南徵求不息人不復業
相率為盜本根一搖憂患不淺其所以然者皆以爭蠻
貊不毛之地乖子養蒼生之道也昔漢元納賈捐之
謀而罷朱崖郡宣帝用魏相之策而棄車師之田豈不
欲慕尚虛名蓋憚勞人力也近貞觀年中克平九姓立
李摩為可汗使統諸部者蓋以夷狄叛則伐之降則
撫之得推亡固存之義無遠戍勞人之役此近日之令
典經邊之故事也竊謂宜立阿史那斛瑟羅為可汗委

之四鎮繼高氏絕國使守安東省軍費於遠方并甲兵
於塞上使夷狄無侵侮之患則可矣何必窮其窟穴與
螻蟻校長短哉但當敕邊兵謹守備遠斥候聚資糧待
其自致然後擊之以逸待勞則戰士力倍以主禦客則我
得其便堅壁清野則寇無所得自然賊深入則有顛躓
之慮淺入必無虜獲之益如此數年可使二虜不擊而
服矣事雖不行識者是之

聖歷元年夏六月甲午命淮陽王武延秀入突厥納款

啜女為妃豹韜衛大將軍閻知微攝春官尚書右武衛
郎將楊齊莊攝司賓卿齎金帛巨億以送之延秀承嗣
之子也鳳閣舍人襄陽張柬之諫曰自古未有中國親
王娶狄夷女者由是忤旨出為合州刺史 秋八月戊
子武延秀至黑沙南庭突厥默啜謂閻知微等曰我欲
以女嫁李氏安用武氏兒邪此豈天子之子乎我突厥
世受李氏恩聞李氏盡滅唯兩兒在我今將兵輔立之
乃拘延秀於別所以知微為南面可汗言欲使之主唐

民也遂發兵襲靜難平狄清夷等軍靜難軍使慕容玄
崱以兵五千降之虜勢大振進寇媯檀等州前從間知
微入突厥者默啜皆賜之五品三品之服太后悉奪之
默啜移書數朝廷曰與我蒸穀種種之不生一也金銀
器皆行濫非真物二也我與使者緋紫皆奪之三也繒
帛皆疎惡四也我可汗女當嫁天子兒武氏小姓門戶
不敵罔冒為昏五也我為此起兵欲取河北耳監察御
史裴懷古從間知微入突厥默啜欲官之不受因將殺

之逃歸抵晉陽形容羸瘁突騎譟聚以為間諜欲取其
首以求功有果毅嘗為人所枉懷古按直之大呼曰裴
御史也救之得全至都引見遷祠部員外郎時諸州聞
突厥入寇方秋爭發民修城衛州刺史太平敬暉謂僚
屬曰吾聞金湯非粟不守柰何捨收穫而事城郭乎悉
罷之使歸田百姓大悅以司屬卿武重規為天兵中道
大總管右武衛將軍沙吒忠義為天兵西道總管幽州
都督下邳張仁愿為天兵東道總管將兵三十萬以討

突厥默啜又以左羽林衛大將軍閻敬容為天兵西道
後軍總管將兵十五萬為後援癸丑默啜寇飛狐乙卯
陷定州殺刺史孫彥高及吏民數千人 九月改突厥
默啜為斬默啜默啜使閻知微招諭趙州知微與虜連手
蹋萬歲樂於城下將軍陳令英在城上謂曰尚書位任
非輕乃為虜蹋歌獨無慙乎知微微吟曰不得已萬歲
樂戊辰默啜圍趙州長史唐般若翻城應之刺史高叡
與妻秦氏仰藥詐死虜輿之詣默啜默啜以金師子帶

紫袍示之曰降則拜官不降則死敵顧其妻妻曰酬報
國恩正在今日遂俱閉目不言經再宿虜知不可屈乃
殺之虜退唐般若族誅贈敵冬官尚書謚曰節敵頗之
孫也甲戌命太子為河北道元帥以討突厥先是募人
月餘不滿千人及聞太子為帥應募者雲集未幾數盈
五萬戊寅以狄仁傑為河北道行軍副元帥右丞宋玄
爽為長史右臺中丞崔獻為司馬左臺中丞吉頊為監
軍使時太子不行命仁傑知元帥事太后親送之癸未

突厥默啜盡殺所掠趙定等州男女萬餘人自五回道
去所過殺掠不可勝紀沙吒忠義等但引兵躡之不敢
逼狄仁傑將兵一萬追之無所及默啜還漠北擁兵四
十萬據地萬里西北諸夷皆附之甚有輕中國之心
冬十月癸卯以狄仁傑為河北道安撫大使時河北人
為突厥所驅逼者虜退懼誅往往亡匿仁傑上疏以為
朝廷議者皆罪契丹突厥所脅從之人言其迹雖不同
心則無別誠以山東近緣軍機調發傷重家道悉破或

至逃亡重以官典侵漁因事而起枷杖之下痛切肌膚
事迫情危不循禮義愁苦之地不樂其生有利則歸且
圖賒死此乃君子之媿辱小人之常行也又諸城入偽
或待天兵將士求功皆云攻得臣憂濫賞亦恐非辜以
經與賊同是為惡地至有汙辱妻子劫掠貨財兵士信
知不仁簪笏未能以免乃是賊平之後為惡更深且賊
務招攜秋毫不犯今之歸正即是平人翻被破傷豈不
悲痛夫人猶水也壅之則為泉疏之則為川通塞隨流

豈有常性今負罪之伍必不在家露宿草行潛竄山澤
赦之則出不赦則狂山東羣盜緣茲聚結臣以邉塵暫
起不足為憂中土不安此為大事罪之則衆情恐懼恕
之則反側自安伏願曲赦河北諸州一無所問制從之
仁傑於是撫慰百姓得突厥所驅掠者悉還本貫散
糧運以賑貧乏修郵驛以濟旋師恐諸將所及使者妄
求供頓乃自食疏糲禁其下無得侵擾百姓犯者必斬
河北遂安突厥默啜離趙州乃縱間知微使還太后

命磔於天津橋南使百官共射之既乃髑其肉剉其骨夷其三族疎親有先未相識而同死者褒公段瓚志玄之子也先沒於突厥在趙州瓚邀楊齊莊與之俱逃齊莊畏怯不敢發瓚先歸太后賞之齊莊尋至敕河內王武懿宗鞠之懿宗以為齊莊意懷猶豫遂與閻知微同誅既射之如蝟氣磔磔未死乃決其腹剖心投於地猶赳赳然躍不止擢田歸道為夏官侍郎甚見親委

二年臘月河南北置武騎團以備突厥 春二月壬辰

以魏元忠檢校并州長史充天兵軍大總管以備突厥
是歲突厥默啜立其弟咄悉匐為左廂察骨篤祿子
默矩為右廂察各主兵二萬餘人其子匐俱為小可汗
位在兩察上主處木昆等十姓兵四萬餘人又號為拓
西可汗

久視元年冬十月辛亥以魏元忠為蕭關道大總管以
備突厥 十二月甲寅突厥掠隴右諸監馬萬餘匹而
去

長安元年夏五月以魏元忠為靈武道行軍大總管以
備突厥 秋八月突厥默啜寇邊命安北大都護相王
為天兵道元帥統諸軍擊之未行而虜退

二年春正月突厥寇鹽夏二州 三月庚寅突厥破石
嶺寇并州以雍州長史薛季昶攝右臺大夫充山東防
禦軍大使滄瀛幽易恒定等州諸軍皆受季昶節度

夏四月以幽州刺史張仁愿專知幽平媯檀防禦仍與
季昶相知以拒突厥 秋七月甲午突厥寇代州 九

月壬申突厥寇忻州

三年夏六月辛酉突厥默啜遣其臣莫賀干來請以女妻皇太子之子 冬十一月己丑突厥遣使謝許昏丙申宴於宿羽臺太子預焉

四年突厥默啜既和親 秋八月戊寅始遣淮陽王武延秀還

中宗神龍元年夏六月壬子以左驍衛大將軍裴思訕充靈武軍大總管以備突厥

二年冬十二月己卯突厥默啜寇鳴沙靈武軍大總管沙吒忠義與戰軍敗死者六千餘人丁巳突厥進寇原會等州掠隴右牧馬萬餘匹而去免忠義官

景龍元年春正月庚戌制以突厥默啜寇邊命內外官各進平突厥之策右補闕盧備上疏以為卻穀悅禮樂敦詩書為晉元帥杜預射不穿札建平吳之勲是知中權制謀不取一夫之勇如沙吒忠義驍將之材本不足以當大任又鳴沙之役主將先逃宜正邦憲賞罰既明

敵無不服又邊州刺史宜精擇其人使之蒐卒乘積資糧來則禦之去則備之去歲四方旱災未易興師當理內以及外綏近以來遠俟倉廩實士卒練然後大舉以討之上善之夏五月戊戌以右屯衛大將軍張仁愿為朔方道大總管以備突厥冬十月丁丑命左屯衛將軍張仁愿充朔方道大總管以擊突厥比至虜已退追擊大破之

二年春三月丙辰朔方道大總管張仁愿築三受降城

於河上初朔方軍與突厥以河為境河北有拂雲祠突厥將入寇必先詣祠祈禱牧馬料兵而後度河時默啜悉衆西擊突騎施仁愿請乘虛奪取漠南地於河北築三受降城首尾相應以絕其南寇之路太子少師唐休璟以為兩漢以來皆北阻大河今築城寇境恐勞人費功終為虜有仁愿固請不已上竟從之仁愿表留歲滿鎮兵以助其功咸陽兵二百餘人逃歸仁愿悉擒之斬於城下軍中股慄六旬而成以拂雲祠為中城距東西

兩城各四百餘里皆據津要拓地三百餘里於牛頭朝
那山北置烽候千八百所以左玉鈴衛將軍論弓仁為
朔方軍前鋒遊奕使戍諾真水為邏衛自是突厥不敢
度山畋牧朔方無復寇掠減鎮兵數萬人仁愿建三城
不置壅門及備守之具或問之仁愿曰兵貴進取不利
退守寇至此當併力出戰回首望城者猶應斬之安用
守備生其退慙之心也其後常元楷為朔方軍總管始
築壅門人以是重仁愿而輕元楷

肅宗景雲二年春正月癸丑突厥可汗默啜遣使請和
許之 三月以宋王成器女為金山公主許嫁突厥默
啜 御史中丞和逢堯攝鴻臚卿使于突厥說默啜曰
處密堅昆聞可汗結昏於唐皆當歸附可汗何不襲唐
冠帶使諸胡知之豈不美哉默啜許諾明日櫜頭衣紫
衫南面再拜稱臣遣其子楊我支及國相隨逢堯入朝
十一月戊寅至京師逢堯以奉使功遷水部侍郎

玄宗先天元年春正月乙未上御安福門宴突厥楊我

支以金山公主示之既而會上傳位昏竟不成

開元元年秋八月丙辰突厥可汗默啜遣其子楊我支來成昏丁巳許以蜀王女南和縣主妻之

二年春二月乙未突厥可汗默啜遣其子同俄特勒及妹夫火拔頡利發石阿失畢將兵圍北庭都護府都護郭虔瓘擊敗之同俄單騎逼城下虔瓘伏壯士於道側突起斬之突厥請悉軍中資糧以贖同俄聞其已死慟哭而去閏月突厥石阿失畢既失同俄不敢歸癸未

與其妻來奔以為右衛大將軍封燕北郡王命其妻曰
金山公主 夏四月丁巳突厥可汗默啜復遣使求昏
自稱乾和永清大駙馬天上得果報天男突厥聖天骨
咄祿可汗 突厥可汗默啜衰老昏虐愈甚壬子葛邏祿
等部落詣涼州降 冬十月己巳突厥可汗默啜又遣
使求昏上許以來歲迎公主突厥十姓胡祿屋等諸部
詣北庭請降命都護郭虔瓘撫存之 十一月丙申遣
左散騎常侍解琬詣北庭宣慰突厥降者隨便宜區處

三年春正月突厥十姓降者前後萬餘帳高麗莫離支
文簡十姓之壻也二與跌跌都督思奉等亦自突厥
帥衆來降制皆以河南地處之三月胡祿屋酋長支
匄忌等入朝上以十姓降者浸多夏四月庚申以右羽
林大將軍薛訥為涼州鎮大總管赤水等軍並受節度
居涼州左衛大將軍郭虔瓘為朔川鎮大總管和戎等
軍並受節度居并州勒兵以備默啜默啜發兵擊葛邏
祿胡祿屋鼠尼施等屢破之敕北庭都護湯嘉惠左散

騎常侍解琬等發兵救之五月壬辰敕嘉惠等與葛邏祿胡祿屋鼠尼施及定邊道大總管阿史那獻互相慶援 秋七月壬戌以涼州大總管薛訥為朔方道行軍大總管太僕卿呂延祚靈州刺史杜賓客副之以討突厥

四年夏六月癸酉拔曳固斬突厥可汗默啜首來獻時默啜北擊拔曳固大破之於獨樂水恃勝輕忽不復設備遇拔曳固迸卒顏質略自柳林突出斬之時大武軍

子將郝靈荃奉使在突厥頡質略以其首歸之與偕詣
闕懸其首於廣街拔曳固回紇同羅霄僕固五部皆來
降置於大武軍北默啜之子小可汗立骨咄祿之子闕
特勒擊殺之及默啜諸子親信略盡立其兄左賢王默
棘連是為毗伽可汗國人謂之小殺毗伽以國固讓闕
特勒闕特勒不受乃以為左賢王專典兵馬 秋八月
突厥默啜既死奚契丹拔曳固等諸部皆內附突騎施
蘇祿復自立為可汗突厥部落多離散毗伽可汗患之

乃召默啜時牙官瞰欲谷以為謀主瞰欲谷年七十餘多智略國人信服之突厥降戶處河曲者聞毗伽立多復叛歸之并州長史王峻上言此屬徒以其國喪亂故相帥來降若彼安寧必復叛去今置之河曲此屬桀黠實難制御往往不受軍州約束興兵剽掠聞其逃者已多與虜聲問往來通傳委曲乃是畜養此屬使為間諜日月滋久姦詐逾深窺伺邊隙將成大患虜騎南牧必為內應來逼軍州表裏受敵雖有韓彭不能取勝矣願

以秋冬之交大集兵衆諭以利害給其資糧徙之內地
二十年外漸變舊俗皆成勁兵雖一時暫勞然永久安
靖比者守邊將吏及出境使人多為諛辭皆非事實或
云北虜破滅或云降戶妥帖皆欲自銜其功非能盡忠
狗國願察斯利口勿忘遠慮議者必曰國家曷時已嘗
寘降戶於河曲皆獲安寧今何所疑此則事同時異不
可不察曷者頡利既亡降者無復異心故得久安無變
今北虜尚存此屬或畏其威或懷其惠或其親屬豈樂

南來校之彼時固不侔矣以臣愚慮徙之內地上也多
屯士馬大為之備華夷相參人勞費廣次也正如今日
下也願審茲三策擇利而行縱使因徙逃亡得者皆為
唐有若留至河水恐必有變疏奏未報降戶跌跌思泰
阿悉爛等果叛冬十月甲辰命朔方大總管薛訥發
兵追討之王峻引并州兵西濟河晝夜兼行追擊叛者
破之斬獲三千級先是單于副都護張知運悉收降戶
兵仗令度河而南降戶怨怒御史中丞姜晦為巡邊使

降戶訴無弓矢不得射獵晦悉還之降戶得之遂叛張
知運不設備與之戰於青剛嶺為虜所擒欲送突厥至
綏州境將軍郭知運以朔方兵邀擊之大破其衆於黑
山呼延谷虜釋張知運而去上以張知運喪師斬之以
狗毗伽可汗既得思泰等欲南入為寇瞰欲谷曰唐主
英武民和年豐未有間隙不可動也我衆新集力尚疲
羸且當息養數年始可觀變而舉毗伽又欲築城并立
寺觀瞰欲谷曰不可突厥人徒稀少不及唐家百分之

一所以能與我為敵者正以隨逐水草居處無常射獵
為業人皆習武疆則進兵抄掠弱則竄伏山林唐兵雖
多無所施用若築城而居變更舊俗一朝失利必為所
滅釋老之法教人仁弱非用武事勝之術不可崇也毗
伽乃止

六年春正月辛丑突厥毗伽可汗來請和許之

八年夏六月突厥降戶僕固都督勾磨及陝跌部落散
居受降城側朔方大使王晙言其陰引突厥謀陷軍城

密奏請誅之誘勺磨等宴於受降城伏兵悉殺之河曲
降戶殆盡拔曳固同羅諸部在大同橫野軍之側者聞
之皆恐懼秋并州長史天兵節度大使張詵引二十騎
持節即其部落慰撫之因宿其帳下副使李憲以虜情
難信馳書止之詵復書曰吾肉非黃羊必不畏食血非
野馬必不畏刺士見危致命此吾效死之秋也拔曳固
同羅由是遂安 冬十一月辛未突厥寇甘涼等州敗
河西節度使楊敬述掠契苾部落而去先是朔方大總

管王峻奏請西發拔悉密東發奚契丹期以今秋掩毗
伽牙帳於稽落水上毗伽聞之大懼瞰欲谷曰不足畏
也拔悉密在北庭與奚契丹相去絕遠勢不相及朔方
兵計亦不能來此必若能來俟其垂至徙牙帳北行三
日唐兵食盡自去矣且拔悉密輕而好利得王峻之約
必喜而先至峻與張嘉貞不相悅奏請多不相應必不
敢出兵峻兵不出拔悉密獨至擊而取之勢甚易耳既而
拔悉密果發兵逼突厥牙帳而朔方及奚契丹兵不至

拔悉密懼引退毗伽欲擊之曠欲谷曰此屬去家千里將死戰未可擊也不如以兵躡之去北庭二百里曠欲谷分兵間道先圍北庭因縱兵擊拔悉密大破之拔悉密衆潰走趨北庭不得入盡為突厥所虜曠欲谷引兵還出赤亭掠涼州羊馬楊敬述遣裨將盧公利判官元澄將兵邀擊之曠欲谷謂其衆曰吾乘勝而來敬述出兵破之必矣公利等至刪丹與曠欲谷遇唐兵大敗公利澄脫身走毗伽由是大振盡有默啜之衆

九年春二月丙戌突厥毗伽復使來求和上賜書諭以
曩昔國家與突厥和親華夷安逸甲兵休息國家買突
厥羊馬突厥受國家繒帛彼此豐給自數十年來不復
如舊正由默啜無信口和心叛數出盜兵寇抄邊鄙人
怨神怒隕身喪元吉凶之驗皆可汗所見今復蹈前迹
掩襲甘涼隨遣使人更來求好國家如天之覆如海之
容但取來情不追往咎可汗果有誠心則共保遐福不
然無煩使者徒爾往來若其侵邊亦有以待可汗其審

圖之

十二年秋七月突厥可汗遣其臣哥解頡利發來求昏
八月丙申突厥哥解頡利發還其國以其使者輕禮
數不備未許昏

十三年張說以大駕東巡恐突厥乘間入寇議加兵守
邊夏四月召兵部郎中裴光庭謀之光庭曰封禪者
告成功也今將升中於天而戎狄是懼非所以昭盛德
也說曰然則若之何光庭曰四夷之中突厥為大比屢

求和親而朝廷羈縻未決許也今遣一使徵其大臣從
封泰山彼必欣然承命突厥來則戎狄君長無不皆來
可以偃旗卧鼓高枕有餘矣說曰善說所不及即奏行
之光庭行儉之子也上遣中書直省袁振攝鴻臚卿諭
旨於突厥小殺與闕特勒瞰谷欲環坐帳中置酒謂振
曰吐蕃狗種奚契丹本突厥奴也皆得尚主突厥前後
求昏獨不許何也且吾亦知入蕃公主皆非天子女今
豈問真偽但屢請不獲愧見諸蕃耳振許為之奏請小

殺乃遣其大臣阿史德頡利發入貢因扈從東巡冬
十二月突厥頡利發辭歸上厚賜而遣之竟不許昏
十四年夏四月辛丑於定恒莫易滄五州置軍以備突
厥

十五年秋九月丙戌突厥毗伽可汗遣其大臣梅錄啜
入貢吐蕃之寇瓜州也遺毗伽書欲與之俱入寇毗伽
并獻其書上嘉之聽於西受降城為互市每歲齎繒帛
數十萬匹就市戎馬以助軍旅且為監牧之種由是國

馬益壯焉

十九年春三月突厥左賢王闕特勒卒賜書弔之

二十二年冬十二月突厥毗伽可汗為其大臣梅錄啜所毒未死討誅梅錄啜及其族黨卒子伊然可汗立尋卒弟登利可汗立庚戌來告喪

二十九年秋七月丙寅突厥遣使來告登利可汗之喪初登利從叔二人分典兵馬號左右殺登利患兩殺之專與其母謀誘右殺斬之自將其衆左殺判闕特勒兵

攻登利殺之立毗伽可汗之子為可汗俄為骨咄葉護
所殺更立其弟尋又殺之骨咄葉護自立為可汗上以
突厥內亂癸酉命左羽林將軍孫老奴招諭回紇葛邏
祿拔悉密等部落

天寶元年八月突厥拔悉密回紇葛邏祿三部共攻骨
咄葉護殺之推拔悉密酋長為頡跌伊施可汗回紇葛
邏祿自為左右葉護突厥餘衆共立判闕特勒之子為
烏蘇米施可汗以其子葛臘哆為西殺上遣使諭烏蘇

今內附烏蘇不從朔方節度使王忠嗣盛兵磧口以威之烏蘇懼請降而遷延不至忠嗣知其詐乃遣使說拔悉密回紇葛邏祿使攻之烏蘇遁去忠嗣因出兵擊之取其右廂以歸丁亥突厥西葉護阿布思及西殺葛臘哆默啜之孫勃德支伊然小妻毗伽登利之女帥部衆千餘帳相次來降突厥遂微九月辛亥上御花萼樓宴突厥降者賞賜甚厚

三載秋八月拔悉密攻斬突厥烏蘇可汗傳首京師國

人立其弟鶻隴白眉特勒是為白眉可汗於是突厥
大亂敕朔方節度使王忠嗣出兵乘之至薩河內山破
其左廂阿波連干等十一部右廂未下會回紇葛邏祿
共攻拔悉密頡跌伊施可汗殺之回紇骨力裴羅自立
為骨咄祿毗伽闕可汗遣使言狀上冊拜裴羅為懷仁
可汗於是懷仁南據突厥故地立牙帳於烏德健山舊
統藥邏葛等九姓其後又併拔悉密葛邏祿凡十一部
各置都督每戰則以二客部為先

四載春正月回紇懷仁可汗擊突厥白眉殺之傳首京師突厥毗伽可敦帥衆來降於是北邊晏然烽燧無警矣

唐平奚契丹

唐太宗貞觀二年夏四月契丹酋長帥其部落來降四年突厥既亡營州都督薛萬淑遣契丹酋長貪没折說諭東北諸夷奚靺婁等十餘部皆內附萬淑萬均之兄也

二十二年夏四月己未契丹辱統主曲據帥衆內附以其地置玄州以曲據為刺史隸營州都督府 冬十一月庚子契丹帥密哥奚帥可度者並帥所部內屬以契丹部為松漠府以密哥為都督又以其別帥達稽等部為峭落等九州各以其辱統主為刺史以奚部為饒樂府以可度者為都督又以其別帥阿會等部為弱水等五州亦各以其辱統主為刺史辛丑置東夷校尉官於營州

高宗顯慶五年夏四月戊辰以定襄都督阿史德樞賓
左武侯將軍延陴真居延州都督李合珠並為冷岍
道行軍總管各將所部兵以討叛奚仍命尚書右丞崔
餘慶充使總護三部兵奚尋遣使降更以樞賓等為沙
磧道行軍總管以討契丹擒契丹松漠都督河卜固送
東都

則天皇后萬歲通天元年夏五月壬子營州契丹松漠
都督李盡忠歸誠州刺史孫萬榮舉兵反攻陷營州殺

都督趙文翽盡忠萬榮之妹夫也皆居於營州城側文翽剛愎契丹饑不加賑給視酋長如奴僕故二人怨而反乙丑遣左鷹揚衛將軍曹仁師金吾衛大將軍張玄遇左威衛大將軍李多祚司農少卿麻仁節等二十八將討之秋七月辛亥以春官尚書梁王武三思為榆關道安撫大使姚璿副之以備契丹改李盡忠為李盡滅孫萬榮為孫萬斬盡忠尋自稱無上可汗據營州以萬榮為前鋒畧地所向皆下旬日兵至數萬進圍檀州

清邊前軍副總軍張九節擊却之 八月丁酉曹仁師
張玄遇麻仁節與契丹戰于硤石谷唐兵大敗先是契
丹破營州獲唐俘數百囚之地牢聞唐兵將至使守牢
霄紹之曰吾輩家屬飢寒不能自存惟俟官軍至即降
耳既而契丹引出其俘飼以糠粥慰勞之曰吾養汝則
無食殺汝又不忍今縱汝去遂釋之俘至幽州具言其
狀諸軍聞之爭欲先入至黃陂谷虜又遣老弱迎降故
遺老牛瘦馬於道側仁師等三軍棄步卒將騎兵輕進

契丹設伏橫擊之飛索以縋玄遇仁節獲之將卒死者
填山谷鮮有脫者契丹得軍印詐為牒令玄遇等署之
牒總管燕匪石宗懷昌等云官軍已破賊若至營州軍
將皆斬兵不叙勲匪石等得牒晝夜無行不遑寢食以
赴之士馬疲弊契丹伏兵於中道邀之全軍皆沒 九
月制天下繫囚及士庶家奴驍勇者官償其直發以擊
契丹初令山東近邊諸州置武騎團兵以同州刺史建
安王武攸宜為右武威衛大將軍充清邊道行軍大總

管以討契丹右拾遺陳子昂為攸宜府參謀上疏曰恩制免天下罪人及募諸色奴充兵討擊契丹此乃捷急之計非天子之兵且比來刑獄久清罪人全少奴多怯弱不慣征行縱其募集未足可用況當今天下忠臣勇士萬分未用其一契丹小孽假命待誅何勞免罪贖奴損國大體臣恐此策不可威示天下涼州都督許欽明之兄欽寂為龍山軍討擊使與契丹戰於崇州軍敗被擒虜將圍安東令欽寂說其屬城未下者安東都護

裴玄珪在城中欽寂謂曰狂賊天殃滅在朝夕公但勵兵謹守以全忠節虜殺之突厥默啜請為太子為國

討契丹冊授默啜左衛將軍冬十月辛卯契丹李盡忠卒孫萬榮代領其衆突厥默啜乘間襲松漠虜盡忠萬榮妻子而去萬榮收合餘衆軍勢復振遣別帥駱務整河阿小為前鋒攻陷冀州殺刺史陸寶積屠吏民數千人又攻瀛州河北震動制起彭澤令狄仁傑為魏州刺史前刺史獨孤思莊畏契丹猝至悉驅百姓入城繕修

守備仁傑至悉遣還農曰賊猶在遠何煩如是萬一賊來吾自當之百姓大悅時契丹入寇軍書填委夏官郎中硃石姚元崇剖析如流皆有條理太后奇之擢為夏官侍郎

神功元年春三月戊申清邊道總管王孝傑蘇宏暉等將兵十七萬與孫萬榮戰于東硃石谷唐兵大敗孝傑死之孝傑遇契丹帥精兵為前鋒力戰契丹引退孝傑追之行背懸崖契丹回兵薄之宏暉先遁孝傑墜崖死

將士死亡殆盡管記洛陽張詵馳奏其事太后贈孝傑
官爵遣使斬宏暉以徇使者未至宏暉以立功得免武
攸宜軍漁陽聞孝傑等敗沒軍中震恐不敢進契丹乘
勝寇幽州攻陷城邑剽掠吏民攸宜遣將擊之不克

夏四月癸未以右金吾衛大將軍武懿宗為神兵道行軍
大總管與右豹韜衛將軍何迦密將兵擊契丹 五月
癸卯又以婁師德為清邊道副大總管右武威衛將軍
沙吒忠義為前軍總管將兵二十萬擊契丹 六月武

懿宗軍至趙州聞契丹將駱務整數千騎將至冀州懿宗
懼欲南遁或曰虜無輜重以抄掠為資若按兵拒守勢
必離散從而擊之可有大功懿宗不從退據相州委棄
軍資器仗甚衆契丹遂屠趙州甲午孫萬榮為奴所殺
萬榮之破王孝傑也於柳城西北四百里依險築城留
其老弱婦女所獲器仗資財使妹夫乙窵羽守之引精
兵寇幽州恐突厥默啜襲其後遣五人至黑沙語默啜
曰我已破王孝傑百萬之衆唐人破膽請與可汗乘勝

共取幽州三人先至默啜喜賜以緋袍二人後至默啜
怒其稽緩將殺之二人曰請一言而死默啜問其故二
人以契丹之情告默啜乃殺前三人而賜二人緋使為
鄉導發兵取契丹新城殺所獲涼州都督許欽明以祭
天園新城三日克之盡俘以歸使乙寃羽馳報萬榮時
萬榮方與唐兵相持軍中聞之恐懼奚人叛萬榮神兵
道總管楊玄基擊其前奚兵擊其後獲其將何阿小萬
榮軍大潰帥輕騎數千東走前軍總管張九節遣兵邀

之於道萬榮窮蹙與其奴逃至潞水東息於林下嘆曰
今欲歸唐罪已大歸突厥亦死歸新羅亦死將安之乎
奴斬其首以降泉之四方館門其餘衆及奚霫皆降於
突厥辛卯制以契丹初平命河內王武懿宗妻師德及
魏州刺史狄仁傑分道安撫河北懿宗所至殘酷民有
為契丹所脅從復來歸者懿宗皆以為反生剗取其膽先
是何阿小嗜殺人河北人為之語曰唯此兩何殺人最
多 秋七月庚午武宜攸自幽州凱旋武懿宗奏河北

百姓從賊者請盡族之左拾遺王求禮庭折之曰此屬素無武備力不勝賊苟從之以求生豈有叛國之心懿宗擁疆兵數十萬望風退走賊徒滋蔓又欲移罪於草野誑誤之人為臣不忠請先斬懿宗以謝河北懿宗不能對司刑卿杜景儉亦奏此皆脅從之人請悉原之太后從之

久視元年初契丹將李楷固善用縲索及騎射舞槊每陷陳如鷲入烏羣所向披靡黃廬之戰張玄遇麻仁節

皆為所絹又有駱務整者亦為契丹將屢敗唐兵及孫
萬榮死二人來降有司責其後至奏請族之狄仁傑曰
楷固等並驍勇絕倫能盡力於所事必能盡力於我若
撫之以德皆為我用矣奏請赦之所親皆止之仁傑曰
苟利於國豈為身謀太后用其言赦之又請與之官太
后以楷固為左玉鈐衛將軍務整為右武威衛將軍使
將兵擊契丹餘黨悉平之 秋七月獻俘於含樞殿太
后以楷固為左玉鈐衛大將軍燕國公賜姓武氏名公

卿合宴舉觴屬仁傑曰公之力也將賞之對曰此乃陛下威靈將帥盡力臣何功之有固辭不受

睿宗景雲元年冬十月丁酉以幽州鎮守經略節度大使薛訥為左武衛大將軍兼幽州都督節度使之名自訥始 十二月壬辰奚霫犯塞掠漁陽雍奴出盧龍塞而去幽州都督薛訥追擊之弗克

玄宗先天元年幽州大都督薛訥鎮幽州二十餘年吏民安之未嘗舉兵出塞虜亦不敢犯與燕州刺史李璡

有隙璉毀之於劉幽求幽求薦左羽林將軍孫佺代之
三月丁丑以佺為幽州大都督徙訥為井州長史

夏六月庚申幽州大都督孫佺與奚酋李大酺戰於冷
陁全軍覆沒是時佺帥左驍衛將軍李楷洛左威衛將
軍周以悌發兵二萬騎八千分為三軍以襲奚契丹將
軍烏可利諫曰道險而天熱懸軍遠襲往必敗佺曰薛
訥在邊積年竟不能為國家復營州今乘其無備往必
有功使楷洛將騎四千前驅遇奚騎八千楷洛戰不利

佺怯懦不敢救引軍欲還虜乘之唐兵大敗佺阻山為
方陳以自固大酺使謂佺曰朝廷既與我和親今大軍
何為而來佺曰吾奉敕來招慰耳楷洛不稟節度輒與
汝戰請斬以謝大酺曰若然國信安在佺悉斂軍中帛
得萬餘段并紫袍金帶魚袋以贈之大酺曰請將軍南
還勿相驚擾將士懼無復部伍虜追擊之士卒皆潰佺
以涕為虜所擒獻於突厥默啜皆殺之楷洛可利脫歸
冬十一月乙酉奚契丹二萬騎寇漁陽幽州都督宋

環閉城不出虜大掠而去

開元二年初營州都督治柳城以鎮撫奚契丹則天之世都督趙文翽失政奚契丹攻陷之是後寄治於幽州東漁陽城或言靺鞨奚靺大欲降唐正以唐不建營州無所依投為默啞所侵擾故且附之若唐復建營州則相帥歸化矣并州長史和戎大武等軍州節度大使薛訥信之奏請擊契丹復置營州上亦以冷陁之役欲討契丹羣臣姚崇等多諫甲申以訥同紫微黃門三品將

兵擊契丹羣臣乃不敢言 秋七月薛訥與左監門衛將軍杜賓客定州刺史崔宣道等將兵六萬出檀州擊契丹賓客以為士卒盛夏負戈甲齎資糧深入寇境難以成功訥曰盛夏草肥羔犢孽息因糧於敵正得天時一舉滅虜不可失也行至灤水山峽中契丹伏兵遮其前後從山上擊之唐兵大敗死者什八九訥與數千騎突圍得免虜中嗤之謂之薛婆崔宣道將後軍聞訥敗亦走訥歸罪於宣道及胡將李思敬等八人制悉斬之

於幽州庚子赦免訥死削除其官爵獨赦杜賓客之罪
四年秋八月辛未契丹李失活奚李大酺帥所部來降制以
失活為松漠郡三行左金吾大將軍兼松漠都督因其八
部落酋長拜為刺史又以將軍薛泰督軍鎮撫之大酺
為饒樂郡王行右金吾大將軍兼饒樂都督失活盡忠
之從父弟也突厥默啜既死奚契丹拔曳固等諸部
皆內附

五年奚契丹既內附貝州刺史宋慶禮建議請復營州

三月庚戌制復置營州都督於柳城兼平盧軍使管
內州縣鎮戍皆入其舊以太子詹事姜師度為營田支
度使與慶禮等築之三旬而畢慶禮清勤嚴肅開屯田八
十餘所招安流散數年之間倉廩充實市邑浸繁 冬
十一月丙申契丹王李失活入朝 十二月壬午以東
平王外孫楊氏為永樂公主妻之

六年夏五月契丹王李失活卒癸巳以其弟婆固代之
七年冬十一月壬申契丹王李娑固與公主入朝

八年契丹牙官可突干驍勇得衆心李娑固猜畏欲去之是歲可突干舉兵擊娑固娑固敗奔營州營州都督許欽澹遣安東都護薛泰帥驍勇五百與奚王李大酺奉娑固以討之戰敗娑固李大酺皆為可突干所殺生擒薛泰營州震恐許欽澹移軍入渝關可突干立娑固從父弟鬱干為主遣使請罪上赦可突干之罪以鬱干為松漠都督以李大酺之弟魯蘇為饒樂都督

十年夏閏五月壬申張說如朔方巡邊己丑以餘姚縣

主女慕容氏為燕郡公主妻契丹王鬱干

十二年契丹王李鬱干卒弟吐于襲位

十三年先是契丹王李吐干與可突干復相猜忌攜公
主來奔不敢復還更封遼陽王留宿衛可突干立李盡
忠之弟邵固為主車駕東巡邵固詣行在因從至泰山
拜左羽林大將軍靜折軍經略大使

十四年春正月癸未更立契丹松漠王李邵固為廣化
王奚饒樂王李魯蘇為奉誠王以上從甥陳氏為東華

公主妻邵固以成安公主之女韋氏為東光公主妻魯蘇

十八年初契丹王李邵固遣可突干入貢同平章事李元紘不禮焉左丞相張詠謂人曰奚契丹必叛可突干狡而狠專其國政久矣人心附之今失其心必不來矣已酉可突干弑邵固帥其國人并脅奚衆叛降突厥奚王李魯蘇及其妻韋氏邵固妻陳氏皆來奔制幽州長史趙含章討之又命中書舍人裴寬給事中薛侃等於

關內河東河南北分道募勇士 六月丙子以單于大
都護忠王浚領河北道行軍元帥以御史大夫李朝隱
京兆尹裴伾先副之帥十八總管以討奚契丹命浚與
百官相見於光順門張說退謂學士孫逖韋述曰吾嘗
觀太宗畫像雅類忠王此社稷之福也可突于寇平盧
先鋒使張掖烏承砮破之於捺祿山

二十年春正月乙卯以朔方節度副大使信安王禕為
河東河北行軍副大總管將兵擊奚契丹壬申以戶部

侍郎裴耀卿為副總管 三月信安王禕帥裴耀卿及

幽州節度使趙含章分道擊奚契丹含章與虜遇虜望
風遁去平盧先鋒將烏承玘言於含章曰二虜劇賊也
前日遁去非畏我乃誘我也宜按兵以觀其變含章不
從與虜戰於白山果大敗承玘別引兵出其右擊虜破
之已巳禕等大破奚契丹俘斬甚衆可突干帥麾下遠
遁餘黨潛竄山谷奚酋李詩瑣高帥五千餘帳來降禕
引兵還賜李詩爵歸義王充歸義州都督徙其部落置

幽州境內

二十一年春閏三月癸酉幽州道副總管郭英傑與契丹戰於都山敗死時節度使薛楚玉遣英傑將精騎一萬及降奚擊契丹屯於榆關之外可突干引突厥之衆來合戰奚持兩端散走保險唐兵不利英傑戰死餘衆六千餘人猶力戰不已虜以英傑首示之竟不降盡為虜所殺楚玉訥之弟也

二十二年夏六月壬辰幽州節度使張守珪大破契丹

遣使獻捷 冬十二月乙巳幽州節度使張守珪斬契
丹王屈烈及可突干傳首時可突干連年為邊患趙含
章薛楚玉皆不能討守珪到官屢擊破之可突干困迫
遣使詐降守珪使管記王悔就撫之悔至其牙帳察契
丹上下初無降意但稍徙營帳近西北密遣人引突厥
謀殺悔以叛悔知之牙官李過折與可突干分典兵馬
爭權不叶悔說過折使圖之過折夜勒兵斬屈烈及可突
干盡誅其黨帥餘衆來降守珪出師紫蒙川大閱以鎮

撫之梟屈烈可突干首於天津之南

二十三年春正月契丹知兵馬中郎李過折來獻捷制
以過折為北平王檢校松漠州都督是歲契丹王過
折為其臣涅禮所殺并其諸子一子剌乾奔安東得免
涅禮上言過折用刑殘虐衆情不安故殺之上赦其罪
因以涅禮為松漠都督且賜書責之曰卿之蕃法多無
義於君長自昔如此朕亦知之然過折是卿之王有惡
輒殺之為此王者不亦難乎但恐卿今為王後人亦爾

常不自保誰願作王亦應防慮後事豈得取快目前突厥尋引兵東侵奚契丹涅禮與奚王李歸國共擊破之二十四年張守珪使平盧討擊使左驍衛將軍安祿山討奚契丹叛者祿山恃勇輕進為虜所敗

二十五年春二月乙酉幽州節度使張守珪破契丹於捺祿山

二十八年秋八月甲戌幽州奏破奚契丹

天寶四載安祿山欲以邊功市寵數侵掠奚契丹奚契

丹各殺公主以叛祿山討破之

五載夏四月癸未立奚酋娑固為昭信王契丹酋楷洛為恭仁王

九載冬十月安祿山屢誘奚契丹為設會飲以蓂莈酒醉而阮之動數千人函其酋長之首以獻前後數四

十載安祿山將三道兵六萬以討契丹以奚騎二千為鄉導過平盧千餘里至土護真水遇雨祿山引兵晝夜兼行三百餘里至契丹牙帳契丹大駭時久雨弓弩筋

膠皆弛大將何思德言於祿山曰吾兵雖多遠來疲弊實不可用不如按甲息兵以待之不過三日虜必降祿山怒欲斬之思德請前驅效死思德貌類祿山虜爭擊殺之以為已得祿山勇氣增倍奚復叛與契丹合夾擊唐兵殺傷殆盡射祿山中鞍折冠簪失屨獨與麾下二千騎走會夜追騎解得入師州歸罪於左賢王哥解河東兵馬使魚承仙而斬之平盧兵馬使史思明懼逃入山谷近二旬收散卒得七百人平盧守將史定方將精

兵二千救祿山契丹引去祿山乃得免至平盧麾下皆
亡不知所出史思明出見祿山祿山喜起執其手曰吾
得汝復何憂思明退謂人曰嚮使早出已與哥解並斬
矣契丹圍師州祿山使思明擊却之

十一載春三月安祿山發蕃漢步騎二十萬擊契丹欲
以雪去秋之耻初突厥阿布思來降上厚禮之賜姓名李
獻忠累遷朔方節度副使賜爵奉信王獻忠有才略不
為安祿山下祿山恨之至是奏請獻忠帥同羅數萬騎與

俱擊契丹獻忠恐為祿山所害白留後張暉請奏留不行暉不許獻忠乃帥所部大掠倉庫叛歸漠北祿山遂頓兵不進

十三載夏四月癸巳安祿山奏擊奚破之虜其王李日越

十四載夏四月安祿山奏破奚契丹

通鑑紀事本末卷二十九下